

東
華
續
錄

東華續錄

咸豐二十

臣王先謙敬編

臣陶澐宣恭校

二月丙子朔諭內閣京師重地各旗營官兵共計十四萬九千有奇素稱勁旅若不勤加訓練俾技藝日精何以備干城之選嗣後該管大臣於所屬之驍騎護軍前鋒步軍以及圓明園八旗健銳火器各營官兵務須挑選精壯實心筋練雖有看守值班之責者亦須輪流入操並擇各該營差使較簡之太臣常川督率每月由閱兵大臣分班親閱使馬步火器一律股整儼各該營官兵或有技藝生疏老弱充數等弊一經查出原必將該管大臣從重懲處決不寬貸懷之勉之將此通諭知之○諭張亮基駱秉章各馳奏抵省任事查辦地方情形一摺賊匪竄擾武昌圍攻帀月官紳士

民嬰城固守迨至賊陷之後慘遭焚掠據奏荼毒情形深堪憫惻除殉難大小官員業經贈卹建祠並俟續查到日再行加恩外著張亮基駱秉章督同嚴正基江忠源及地方署事各員將見在存城老幼男婦並被擄逃回各丁壯加意撫恤一面掩埋屍骨安集流亡招致商民嚴懲土匪毋令一夫失所漢陽收復蹂躪凋殘亦與省城大略相似其應派員前往撫綏之處著該署督撫妥爲籌辦俾兵燹遺民漸安生業以慰朕懷○諭黃宗漢奏請將商販米船免稅等語浙省見當災歉之後又值長江有警商販鮮通民間乏食地虞自應設法招徠以期接濟所有各省商人持照運米赴浙者無論河運海運經過水陸各關口均著免其納稅以廣招徠而裕民食○諭軍機大臣等李德奏密籌防堵一摺據稱自東昌關兵南至曹郡履勘河隄已飭將各渡口船隻並曹縣之劉家口

單縣之董家口二處不准別口私渡該府屬與直隸江南接壤擒
匪潛蹤經該撫派委候補道劉慶凱等稽查按捕並令總兵三星
保督查其兗沂兩府復派該道厲恩官駐紮要地會同遊擊王鳳
祥認真查辦並令總兵百勝帶兵嚴防籌辦均屬妥協惟土匪捻
匪出沒靡常且豐工不日合龍難保無失業游民四出滋擾見在
逆匪竄擾安徽一帶山東防堵亦甚緊要李德仍須出省前往扼
要處所擇地駐紮庶鎮道有所稟承防守愈形嚴密又有人奏團
練之法須簡派公正州縣慎選紳耆無假手胥吏等語著採擇酌
辦原片鈔給閱看將此由五百里諭令知之○諭李德奏密籌防
堵一摺據稱親至兗沂曹三郡履勘河隄將各渡口船隻歸併劉
家口董家口兩處不准別口私渡設遇賊烽漸近即將船隻盡收
北岸並派文武員弁駐紮盤查辦理尙屬妥協惟兗沂兩府與江

省接壤豐沛邳宿等處皆屬平川無險可扼淮徐兩府濱臨大河
南北兩岸緊要渡口必須一律防範著楊殿邦楊以增等飭令該
州縣將私渡歸併大渡仍遵前旨非有官票不准偷渡兩省合力
嚴查毋任土匪往來勾結見在逆匪已陷安慶省城江北情形緊
急淮揚尤爲喫重且豐工不日合龍遣散夫役被難窮民均宜設
法彈壓該督等務宜遴派幹員認真妥辦南防江口北扼黃河毋
令奸匪潤迹將此由五百里各諭令知之○贈湖北殉節學政光
祿寺卿馮培元侍郎銜諡文介布政使梁星源諡敏肅按察使瑞
元諡端節道員王壽同王東槐林恩熙知府明善董振鐸同知周
祖銜知縣繡麟均予祭葬世職加等並予巡撫常大瀄等各建專
祠○予廣東勦賊傷亡知縣冒芬祭葬世職○丁丑祭先師孔
子 上親詣行釋奠禮○諭內閣本日據楊以增馳奏豐北大工

合龍穩固全黃歸正一摺此次興辦大工責成楊以增查文經專
心督辦節據該河督將辦理情形隨時奏報至本年正月二十日
啟放引河大溜夾凌下注甚爲暢順茲據奏稱於二十六日挂纜
合龍竭一晝夜之力追壓到底正溜悉歸故道順軌東趨查勘運
河並無淤塞此皆仰賴 天恩 神佑俾於初春一律蒧功朕欣
幸之餘倍增寅感卽日派恭親王奕訢敬詣圓明園 惠濟祠
河神廟代朕拈香叩謝著發去大藏香十炷交楊以增祇領虔赴
工次各處 河神廟代朕敬謹祀謝以答 神庥楊以增經理得
宜不負委任著加恩開復革職畱任處分給還頂帶賞加三級其
前次捐輸河工經費並著交部從優議敘查文經襄辦大工始終
奮勉更能認真稽覈節省錢糧著加恩開復處分並賞戴花翎其
餘在工出力員弁等該河督覈實保奏候朕施恩毋許冒濫見在

大工甫經告成善後各工均關緊要仍著楊以增督飭各員弁妥協辦理務須慎益加慎以期全工穩固永慶安瀾○諭太常寺少卿雷以誠翰林院侍講學士晉康著前往南河會同楊以增巡查黃河口岸詹事府少詹事王履謙著前往東河會同福濟巡查黃濟巡查至山東沿河各岸業經巡撫李鴻章派員查辦其河南一帶並著陸應穀會同稽查無稍疏懈○諭軍機大臣等有人奏江蘇儀徵縣素爲鹽販聚積之所豐工堵築民夫未卽散遣請就近招募悉爲我用上海道吳健彰素爲民吏所服請諭令募雇兵船儲備火攻前赴金陵迎剿等語軍務緊急自應添雇壯勇以助軍威已有旨諭令該督等妥籌辦理見在豐北業已合龍工作民夫可以復業自應以散遣爲正辦鹽販及糧船水手或可酌量招徠但

必擇其健壯有用者以備驅策仍須妥爲駕馭毋貽後患上海商船是否由吳健彰雇至江甯其中儻有習教者恐被該逆煽誘仍須加意選擇毋滋流弊將此由六百里諭知楊殿邦楊文定並傳諭聯英倪良燿吳健彰知之○祥厚陸建瀛霍隆武福珠洪阿奏
臣陸建瀛馳赴安徽太平府在東西梁山察看情形太平府爲由安徽入江甯省城東路飭該署府潘筠基招募鄉勇一千名備防由采石磯而進江甯鎮爲江甯省城門戶飭江甯府魏亨達等亦募鄉勇一千名備防龍江關安水勇五百名上河安商勇一千二百名布置已定仍回省城會辦防務詎本月二十五日三更後賊船在太平府四合山順流而下二十六日辰刻福山鎮總兵陳勝元督飭官弁兵勇分駕艇船迎敵打沈逆船三隻餘匪隨退追至蕪湖見逆船蔽江而下兩岸均有匪黨由陸路前進各船開礮攻

擊打沈逆船二十餘隻兩岸匪黨亦被礮擊傷無算攻至酉刻天
晚風息不能前進乃該逆於戌刻乘流復下我兵攻擊多時陳勝
元中礮落水殞命江甯省城喫重防守最爲緊要見在旗綠各兵
合計不過五千名而所調外營及山東兵丁均無來信臣陸建瀛
前募之勇亦未到齊惟有顓懇 天恩俯念省城要地南北咽喉
東南財賦之區重大過於他省迅飭向榮琦善陳金綬等飛速馳
赴江甯以保危城惟江甯省城周圍九十餘里防守尤難見在兵
力旣單臣等不敢拘泥原奏總以登陴固守爲要俟向榮等兵到
後再行分布城內外儘力攻剿 上諭逆船已至蕪湖一帶勢甚
披猖東西梁山去蕪湖甚近該處設有重兵水陸兼防著祥厚督
飭在事將弁竭力堵禦如迎剿得手卽一面續派水陸兵勇前往
接應向榮如已抵梁山卽著會同協力抵禦遏其下竄之路江甯

省城爲南北屏障地方最爲險要城垣亦尙堅固雖存城旗綠營兵僅五千名而紳民團練各保身家此時若能官民協力同心眾志成城亦可禦災捍患著卽傳旨曉諭合城官兵紳民務當嬰城固守嚴查奸細以待外援向榮統帶大兵馳抵省垣則聲勢更壯人心益固祥厚等卽當督同城內紳民兵勇及城外各兵駐紮堵剿兼施殄此醜類如此時向榮尙未趕到或前途文報阻隔著將此旨選派健足繞道馳遞向榮軍營迅催赴援本日豐工已報合龍仰賴 天恩助順東南大局必當有轉機也鄒鳴鶴雖無地方之責旣已奉旨幫辦防堵值此守禦緊要之時陸建瀛忽請令暫回養病殊不可解鄒鳴鶴著毋庸回籍仍令幫辦省城防守事宜可也將此由六百里加緊諭令知之○諭前因安徽省城失守江甯防剿喫緊疊經諭令向榮迅速赴援並諭沿途地方倉糧庫存

銀兩均准該大臣隨處支用以濟軍需見在是否帶兵前往未見
奏到朕心實深焦盼見在江甯省城十分喫緊合計旗綠各營兵
丁不過五千名而所調外營及山東營兵並前募之勇均未到齊
難資守禦該大臣著仍遵前旨飛赴江甯督率鎮將竭力防剿毋
稍遲延將此由六百里加緊諭令知之○周天爵奏查賊見破安
慶廬州鳳陽必不能守臣一面札飭廬鳳潁道奎綬將庫儲一切
款項胥解宿州陸續搬運徐州備北來大兵之用臣料逆賊竊踞
江甯必以鳳廬爲屏藩正陽關臨淮關二處必有賊兵埋伏此時
此勢實關天下安危凡有自北省調到之兵臣皆截畱以備防剿
之用又江北旣用東三省兵由中路進剿江南急須調生力軍由
水陸兩路夾攻臣查廣東兵勇皆大可用相應請旨飭下雨廣總
督速選水陸兵各一千名外募義勇各二千名一起度嶺由江西

鄱陽入大江截其歸路一起航海入江駐紮圖山關鷺鼻嘴一帶截賊前路卽令水師提臣洪名香等管帶前來首尾夾擊東省大兵直出中路不難轉危爲安更請飭江西湖南廣東督撫臣等採辦毒藥物料三十萬斤歸臣製造備用 上諭寄諭安徽巡撫周天爵逆匪攻陷安慶其北路廬鳳一帶最關緊要陳金綬統帶大兵前往此時計已馳入皖境卽著該撫遣人迎催扼要駐紮與見所集兵勇會合一處力堵逆匪北竄之路再琦善統領重兵久紮信陽屢次催令馳赴安徽應援乃輒以羸頭不足任意遷延而該撫前奏又云聞賊有另股竄汝甯信陽一帶難保非琦善倡此游言傳播遠近以自掩其遲緩之咎著該撫迅卽先催陳金綬所帶四千官兵前進並知照琦善趕緊督兵前來接應仍密爲訪查如琦善有故意逗遛情事卽行據實奏聞所請調口外獵戶生軍猝

不易辦至東三省官兵素稱勁旅若調度有方必可得力該撫稱其斷不可用未免豫存成見此次朕特派一二品大員管帶並令王大臣嚴申紀律該管兵尙遵約束其吉林官兵已由河南前赴安徽黑龍江官兵見令改道由山東徑赴安徽一帶路途更爲便捷此項官兵卽著該撫先行酌量扼要地方妥爲布置不以有用之兵置之無用之地至奎綬稟稱總兵王鵬飛不知去向是否逃散及滁州知州先期奉委出城是否捏飾省城被賊搶去款項究有若干均著查明具奏廬鳳道庫見存銀兩若干此時是否業已運至徐州萬不可有疏失見在向榮計已帶兵可達江甯該處城大兵單待兵甚急且係東南最要省會若能保全於大局極有關繫如賊匪全力直撲江甯陳金綬之兵仍須渡江援應不可置江南於不顧也該撫膺茲重任責無旁貸務當統籌全局兼權緩急

平心論事竭力辦公以赴委任將此由六百里加緊諭令知之○
諭逆匪連檣東下安徽省城失守其下游江甯一帶尤形喫重著
葉名琛柏貴卽選派水陸精兵二三千名或由江西鄱陽湖入江
或由海道入江並著派大員管帶迅速前赴江南以助攻剿並著
派員採辦毒藥物料堪備火攻之用者迅解安徽交周天爵備用
將此由六百里諭令知之○諭本日已有旨派雷以誠晉康前赴
南河王履謙並刑部員外郎邵懿辰前赴東河見在逆匪竄入安
慶被難窮民紛紛逃避難保無奸匪溷迹其中希圖渡黃北竄東
南兩河緊要各渡口必應一體防範稽查所有派出各員一時未
能趕到著楊以增福濟陸應穀飛飭所屬將各處渡口歸併大渡
非有官票不准私渡並委幹員前往協同該管各官實力巡查遇
有南來難民妥爲曉諭毋令渡河均於南岸安插撫恤或由該地

方官資遣回籍如查有奸宄潛涵卽嚴拏懲辦此事最關緊要萬勿稍存大意據楊以增馳奏豐工見已合龍在工夫役人等有業可歸尤當善爲遣散免致別滋事端將此由六百里各諭令知之

○命湖北按察使江忠源江南壽春鎮總兵官鄧紹良速赴欽差大臣向榮軍營聽候差遣○實授周天爵安徽巡撫○贈江南陣亡總兵官陳勝元提督銜予祭葬世職○戊寅祭 大社 大稷

○祥厚霍隆武奏江甯省城周圍九十六里旗營甲兵閒散三千九百餘名經霍隆武帶領旗兵一千名福珠洪阿及總兵程三光各帶兵一千名駐紮城外互爲犄角之勢省標綠營兵丁無多前調山東兵二千名尙未接到啟程日期城內兵力太單經督臣陸建瀛商同臣等將福珠洪阿帶領本標兵二百名進城協防霍隆武亦撤回城內除派旗兵二千三百名分守城上及添撥龍廣山

扼要防守外下餘旗兵於城內適中地方分紮三營以備何城有警卽行策應刻下賊氛逼近城大兵單防禦萬分危迫惟有仰懇

天恩迅催向榮琦善陳金綬兼程抵甯協勦並請飭下李德飛

催前調山東官兵趕緊星馳來甯以資協勦楊文定文藝奏

臣楊

文定因鎮江辦防未能安速奏明於二十一日馳往督辦於二十

三日抵鎮江城內外已遷徙一空隨與

臣

文藝晤商城內有旗兵

一千三百名城守營兵三百名京口協師船十隻又調到協標河

標等營兵各五百名至設礮防險修城置械以及一切守禦之具

詢之府縣僉以蘇藩司撥銀未到無從措辦

臣

楊文定先經奏明

截留丹陽漕糧解鎮濟用一面札飭蘇藩司催令解銀委員兼程

趲行

臣

等隨時登城周歷履勘見西南東三面羣山環繞北面濱

江近城處又有北固山峙其上是城內宛如釜底防守實難再三

斟酌惟有守險之一法當商同派撥協領管帶旗兵五百名於北固山據守京口師船於金山下排列山上派京口標兵五百名設防金雞嶺先派鎮江營兵三百名前往俟河標等營官兵五百名到齊卽令赴金雞嶺更換城守兵三百名回城守禦以資熟手見在仍委員前赴各沙洲招募洲民前來城內協守儻能練集千餘人亦略備防守之用統由臣文藝酌量調派惟晝夜輪替挑補游兵此數斷不足恃然實已無可再增惟求 皇上嚴飭帶兵各大臣統前迎擊勿使順流而東再蕪湖爲江蘇全省水陸總隘東壩乃入蘇捷徑並形喫重蕪湖屏蔽旣撤東壩必須添設重防第無兵可增臣楊文定擬卽親往相度是否有要隘可守並飭令委員雇募糧船水手前往堵禦容俟勘明再行具陳 上諭軍機大臣等祥厚等奏賊船逼近急望援兵一摺本日據向榮馳奏因九江

船隻不齊特發大兵六成先行渡江從陸路趕緊追襲一俟船到
卽親督全隊兼程前進等語仍由六百里加緊寄諭向榮催令飛
速前進矣昨據李德奏已於附近鎮屬挑備兵丁二千名限於正
月二十一日以後啟程是各路援兵計日均可趕到該大臣等務
須激勵弁兵及闔城紳民竭力固守以待救援楊文定旣退赴鎮
江今又以東壩爲入蘇捷徑復擬親往堵築東壩地方原亦緊要
前已有旨令聯英酌量防堵該撫統轄全省何處喫緊卽在何處
設法堵截朕亦不爲遙制儻但謀退守任賊闖入以致民遭荼毒
朕惟執法從事決不姑寬見在逆船蔽江而下輜重均在船中著
祥厚楊殿邦楊文定文藝及該省藩臬以下各員趕緊出示曉諭
本地紳民團勇之外如捆鹽商販糧船水手不論何項人等有能
擒獲賊船者除軍器火藥繳官外所有船上貲財貨物盡行賞給

搶獲之人以示獎勵其有雇覓船隻焚燒賊船及挫斃長髮頭目者該大臣等卽行奏請破格施恩俾人人感奮賊燄自消將此由六百里加緊諭知祥厚福珠洪阿霍隆武楊殿邦楊文定文藝並傳諭祁宿藻聯英倪良燿劉良駒但明倫知之○向榮奏逆匪竄越九江順流直下臣於十四日紮營九江城外旣因無船不能渡江又因兵勇疲乏過甚延至二十日外方能先後到齊因與各鎮將籌商分由水陸追剿直躡賊蹤當經飛咨撫臣張芾由南昌省河趕緊雇覓大船數百隻如不足數將回空糧船百隻卽日放下九江分撥大兵六成先行渡江從陸路趕緊追襲臣一俟船到卽親督全隊兼程前進庶可水陸兜擊竊意逆匪下竄不特安慶萬分喫緊江南亦全省震動若下游能扼險圍截追軍一到卽可會剿以遏賊鋒逆匪銀糧輜重盡在船中該逆斷不肯棄舟從陸我

兵非戰船不能痛加懲創昨聞上海泊有火輪船上海道吳健彰於海上情形最爲熟習見已飛札該道配齊挖罟三板等項戰船督赴江南聽候調遣又聞溫州洋面有頭蟒船及挖罟大爬等項均屬船堅礮利但未識船有若干礮勇多寡臣已飛飭溫州鎮總兵查明前項船隻委水師得力大員統帶前往江南會剿一面飛咨督臣陸建瀛及閩浙總督浙江提督查明二項戰船飛飭妥速辦理以期水面攻剿得力其逆船過多宜於火攻四川富順縣所產井油點然入水不滅燒船尤爲神物並川省所造鐵火箭亦爲軍前利器臣飛咨四川督臣迅速酌量解運來營以資利用至軍營官兵較多於一切籌備軍餉軍火派隊打仗稽覈功過均屬最要之事臣雖竭力籌辦究恐耳目難周茲查綏靖鎮總兵和春涼州鎮總兵馬龍隨臣軍營日久於緩急情形尙能曉然見派該總

兵等充當行營翼長期收指臂之助又查潮勇一項獷悍不馴見在隨營之潮勇二起共二千四百餘名業已陸續隨到九江臣見咨商撫臣張芾於江西州縣丞倖中無論實任候補如籍隸潮州者速派數員來營分起管領設法遣撤一面收回器械一面酌給路費俟委員到時責成管束能撤至廣東交界地方或可不至復來其捷勇提標五項壯勇內有未能得力者見飭帶勇各員極力挑選將怯弱者概行撤去庶勇歸實用餉不虛糜其陸路追擊之兵業已渡江前進臣俟催到船米餉銀卽趕緊督兵進發相機剿捕又奏查逆船東竄臣督兵追擊途中諜報並無賊用木簕堆垛之事惟賊船有二千餘隻之多在武昌省城得大礮二百數十位其由岳州下竄湖北九江所得之礮自亦不少是該逆船礮俱多此時剿捕非用戰船不能挫其兇鋒故臣於浙江温州江蘇上海

等處調集水師戰船俾得水陸夾攻殲茲醜類臣卽日督兵馳往
前途再行相機籌辦上諭江甯望援甚急疊經降旨著向榮統
帶大兵兼程馳赴江甯會合夾擊計已接奉寄諭何以二十六日
該大臣尙在九江前據張芾奏雇船六十餘隻並借用糧船載兵
渡江諒早已駛到九江著該大臣卽統帶大隊精兵揚帆東下迅
抵江甯相機進剿軍營所需糧餉疊次諭令張亮基將糧臺銀米
轉運江西並諭張芾於前解銀十萬兩外仍須或銀或米酌量接
濟又諭該大臣於沿途地方糧米庫項俱准酌用諒不至於缺乏
所調廣東師船上海戰船温州頭蟒等船四川井油及火鐵箭等
項著卽飛催各該督撫迅速運往以供要需潮勇爲害地方實堪
痛恨應如何分作數起設法遣散或相機懲辦儘可便宜行事毋
致養癰貽患襄陽土匪早已解散所撥官兵二千七百名自應一

併調赴江南岳州長沙所雇船破至今未到何以如此遲滯著卽查明據實參奏並嚴催趕到毋任久延刻下軍情緊急江甯省城關繫東南大局向榮身受重恩自當勉力圖報斷不至藉口船糧未齊遲疑觀望總期迅赴江南與將軍祥厚等勦力同心滅茲醜類朕南望江國寢饋難安該大臣當何以仰體朕心耶將此由六百里加緊諭令知之○諭逆匪竄入安徽省城賊船數百隻順流而下江甯情形緊急向榮駐紮九江需船甚急前奏雇船六十隻並借糧船應用想已催趨前進無誤事機向榮所帶潮勇沿途滋擾見已咨商該撫派員來營管領遣撤並著設法安速辦理免致別滋事端將此由六百里諭令知之○己卯諭內閣惠親王等奏請添派重兵前往剿賊一摺所有軍餉自應寬爲籌備著大學士軍機大臣九卿會同戶部速議具奏至該部各項例發經費內應

如何酌量裁汰以備軍餉之處著一併議奏○諭軍興以來已越兩年逆匪自粵而楚攻陷州郡蹂躪地方吾民顛沛流離實堪憫惻業經先後降旨令將廣西湖南湖北被擾地方應徵地丁錢糧分別蠲緩以蘇民困見在賊自九江東竄安慶失守民間遷徙倉皇遭罹兵燹春耕將及力作未遑睠念南邦實深靡繫所有江西安徽沿江一帶被賊擾害各州縣應徵新舊錢糧著各該督撫確切查明迅速奏請蠲緩其附近地方雖與被兵處所稍有不同而警報頻聞民難安業著一併查明分別奏請恩施用示朕軫念窮黎至意○諭前因各城司坊等官於鄰境匪犯多有弋獲而本任捕務轉致廢弛曾經降旨令將本任未獲之案於請獎摺內隨案聲明原所以整捕務而除積習乃近年以來重案疊出而破獲甚屬寥寥在本任之員或限於地面耳目未周鄰近各官又因承緝

有案不能奏邀獎敘牽制觀望亦所不免嗣後五城司坊各官遇有拏獲鄰境案犯仍准該御史隨案聲請鼓勵其本任承緝應得處分照例各歸本案開參毋庸於摺內聲敘該巡城御史等務當嚴飭所屬不分畛域一體查拏儻因奉有此旨遂有取巧之心置本任捕務於不顧卽行據實嚴參毋稍徇隱○諭軍機大臣等楊殿邦奏請調精兵水陸兼防並請飭調徐州鎮兵各摺片賊匪已至蕪湖順流而下且水陸並進江甯城大兵單勢甚危急而下游瓜州京口爲南北咽喉均極喫重楊殿邦旣已馳抵瓜州並察看陸路由廬滁等處繞道天長六合可以直達儀揚必須扼要設防方爲嚴密該漕督調各省精兵其福建之二千名本日已降旨令怡良王懿德迅速揀調派員管帶由浙江一路前赴江南交該漕督調遣至浙江官兵本屬柔脆且賊蹤逼近鎮常各郡該省先已

調出官兵不少見在正須籌辦堵禦恐難分撥山東爲京師屏障
節據李德奏稱該省官兵不能再行調撥此時防守河口需用孔
殷惟安徽省前調浙江山東官兵尙有在途未到者卽著楊殿邦
楊文定查明催調前赴揚州之儀徵瓜州各口與陸路上游各要
隘迅爲布置防守並據李德奏挑兵二千名限正月二十一日以
後啟程前赴江甯著該漕督巡撫酌量緩急如江甯省城向榮大
兵已到卽可將此項兵丁調至江口上下以備防勦豐工見已合
龍著楊以增飭令徐州鎮迅卽揀調該標得力官兵五百名速飭
前赴瓜州江口交楊殿邦撥用毋稍貽誤其江西撤回之江蘇兵
內有漕標兵四百名亦可調用楊文定已赴東壩所有鎮江防守
事宜仍著楊殿邦與文藝熟籌兼顧和衷商辦務與楊文定聲勢
聯爲一氣互相策應江甯省城由句容至丹陽可以越過鎮江而

蕪湖東至高清由東壩經溧陽宜興又係入蘇之路該逆詭計百出或揚言將攻江甯我必以全力赴之而暗分股匪襲我之所不備尤須豫爲密防該撫親往東壩相度有無險要可守所募糧船水手能否得力句容距該處較遠該撫在鎮江時是否先已籌及派兵設防著速查地方形勢卽行辦理至福山鎮水師營兵見已調撥上游若干是否尙敷徵調仍著該漕督酌量妥辦朕亦不爲遙制所有上游商船曾否由該道吳健彰雇募由海入江以資攻剿其沿海港汊商漁船隻及崇明寶山鳥船尤須及早收用或飭令收藏僻處無爲賊得將此由六百里加緊各諭令知之○諭瓜州鎮江爲南北咽喉文報往來必由之路該處兵力極單不敷防守著怡良王懿德迅卽於福建省各標營內揀派得力精兵二千名派委勇幹將弁管帶配足軍裝器械飭令迅速啟程由浙江行

走徑赴江蘇交楊殿邦調遣惟該省辭此調赴楚省官兵經向榮
奏查臨陣輒先退避總兵郭仁布駕馭無能此等征兵赴調糜餉
失機實堪痛恨業經向榮飭令撤回閩省此次揀調務須實在得
力足資禦侮者方爲妥善所派將弁尤須平日講求訓練約束嚴
明者飭令管帶不得以遵派啟程一奏塞責並須嚴飭該帶兵官
員兼程趨行毋得稍事逗遛或致沿途滋擾爲要將此由六百里
加緊諭令知之○諭張芾奏委員總司行營糧臺一招見在大兵
馳抵江南需用糧餉自應就近於江西設立總局多委幹員經理
方不致貽誤既經該撫派令前任長蘆鹽運使彭玉雯江西鹽法
道熊載總司行營糧餉事宜著卽設立總局飭令安速籌辦其應
帶隨員卽由該二員商同揀派務擇實心任事操守清廉者俾司
支放毋得濫竽充數無論大軍行抵何處所需糧餉卽著該員等

沿途支應源源接濟不可稍事推諉致誤軍行惟經費支絀之時尤宜認真稽覈毋得稍有浮冒將此由六百里加緊諭知張芾並傳諭彭玉雯熊羆知之○賞前任長蘆鹽運使彭玉雯按察使銜馳赴向榮軍營幫辦軍務仍總司糧臺○庚辰諭軍機大臣等寄諭欽差大臣江甯將軍祥厚等本日據周天爵奏逆匪大隊直犯江南省城文報不通一摺覽奏不勝焦灼已飛諭向榮陳金綬各帶大兵分路來援並令琦善帶兵在江北接應矣該大臣等務須督率在城紳民兵勇竭力固守以待外援俟大兵雲集內外夾擊必可取勝所有城內布置機宜與甞聽諸法須嚴密防備不可稍涉疏忽至揚州鎮江一水可達亦難保該逆不分股滋擾著該漕督巡撫等於江西趕緊設法堵禦鹽販及糧船水手皆可招爲我用豐工遣散人夫並著楊以增畱心防範勿令爲賊所誘將此由

六百里加緊各諭令知之○諭周天爵奏逆匪大隊東下直犯江南甯城未將月日聲敘殊深焦急向榮諒已自江南啟程著卽遵照前旨迅速馳赴江甯若稍緩須臾恐該省城大兵單不能堅守一有疏失東南大局關繫非細賊船蟻聚江干利用火攻該大臣既有船隻著卽設計施行不可坐失機會本日又催令陳金綬先行帶兵馳往救援該大臣到後與該提督合力攻擊俾逆匪知外援已至有所顧忌牽掣庶不至以全力攻城而省圍可解務卽先儘所有之船督兵由水路疾駛往救至陸路各兵跟接前進不可以等候船隻再事遷延江甯安危繫於該大臣此行朕急盼捷音毋負委任將此由六百里加緊諭令知之○諭見在賊匪已至江甯該省城大兵單望援甚急陳金綬接奉此旨著卽星速南馳渡江援救惟所帶官兵僅四千名仍恐不敷調遣著琦善再撥給精

兵四五千派員管帶兼程馳赴江南交陳金綬調度琦善卽督率見帶官兵前進一面飛催吉林黑龍江馬隊扼要防守江北浦口一帶爲陳金綬接應賊船蟻聚江干利用火攻該大臣所帶火箭卽設計施行向榮前在九江覓得船隻本日已諭令督兵赴援江甯要地當此萬分喫緊之時該大臣等務宜水陸並進協力夾攻毋令稍有疏虞將此由六百里加緊諭知琦善陳金綬並諭勝保知之○諭呂賢基奏行至涿州接到周天爵信函並將原函呈進披覽均悉賊匪已滿浦口淮徐亂民蜩起經周天爵飛飭前路收集逃兵彈壓土匪招集北勇千餘人截畱北來兵二千名不靖之徒當可稍知斂迹該侍郎卽迅速前進抵皖後會同周天爵商辦一切至所請許該撫便宜行事之處當此賊氛未靖自宜猛以濟寬且距京數千里必事事請命亦恐坐失機宜惟立法從嚴必須

情眞罪當始足以服人心儻誤聽人言並無實據輒用極刑恐人心渙散亦足召亂已寄諭周天爵令其加意慎重矣見在軍務絡繹驛站支應較繁是以前次派往軍營及河工人員均未令其馳驛該侍郎隨帶之李鴻章等卽抵皖稍遲亦無不可仍著無庸馳驛嗣後發遞摺件除緊要軍務由六百里馳奏外其尋常奏報卽由馬上飛遞周天爵原信發回將此諭令知之○諭寄諭安徽巡撫周天爵據呂賢基奏途次接到周天爵來函附摺呈覽該撫擬將貪懦不職之員嚴加懲創原爲力挽頽風起見惟該員等惡蹟務須查勘確實必得情眞罪當始足以服人心儻或得自傳聞未有實據仍當再加察訪斟酌辦理該撫秉性公忠朕所素知必能於嚴峻之中持以愼重不負委任也至所稱北來之兵皆截畱於宿州此項兵丁必須調往江甯應援者見在江甯危急何得置之

不願著速撥前往不可遲誤再安徽前調之山東兵尙有未到者
昨已諭令楊殿邦楊文定查明催調前赴揚州各口布置該撫亦
不得概行截留將此由六百里加緊諭令知之○諭寄諭河南巡
撫陸應穀前因周天爵奏擇要防堵摺內有聞賊另股奇兵竄至
信陽汝甯一帶等語當命查明何處傳來之信迅速具奏並寄諭
該撫確查奏聞本日據周天爵馳奏探聞江甯被圍已有旨飛催
琦善向榮陳金綬分赴江南江北援救其餘賊竄信陽一節則稱
實係真確傳說者卽其家鄉被害之人或地方官隱匿不報等語
如果屬實該撫豈無見聞或地方官因非大隊賊匪視爲無關緊
要或該匪等旋來卽去未有竄擾實迹亦未可知著該撫仍遵前
旨迅速查明不必因前此未經奏報稍存回護將此由六百里諭
令知之尋奏確查信陽等處扼要邊境俱有兵勇巡緝賊匪無由

飛越復徧訪鄉民咸稱並無另股逆匪竄入蹤迹報聞○辛巳諭內閣僧格林沁花沙納奏遵旨查鈔一摺已革大學士賽尙阿前在廣西軍營勞師糜餉日久無功已革兩廣總督徐廣縉接受關防督辦軍務遷延不進以致武昌漢陽等府相繼失守已革兩江總督陸建瀛帶兵防堵九江一戰兵潰置九江於不顧遽回江甯以致省城驚擾賊船下竄已屬罪無可逭除將在京寓所貲財家產分別查鈔並賽尙阿之子先已有旨革職外所有徐廣縉之子刑部員外郎徐叔喬陸建瀛之子六部員外郎陸鍾漢均著革職徐廣縉陸建瀛原籍家產及任所貲財一併查鈔○諭軍機大臣等有人奏請實力革去步營弊端等語據稱該營各旗辦事人多由召募充當包庇賊犯近日各營拏獲奸細送至提督衙門門役監役無不索錢以致相率不拏又門領門千總門甲賣放米車影

射出城惟西直門爲甚以上各弊端如果屬實殊干例禁著步軍
統領衙門按照摺內所指情節認真釐剔嚴禁把持需索賣放等
弊當此稽查整頓之際花沙納甫經到任務須與該總兵等破除
情面覈實辦理不得任聽所屬蒙混一奏塞責原奏條款著鈔給
閱看將此諭令知之○諭本日據禮部尙書奕湘奏福山爲大江
入海門戶宜防守兩岸礮臺並調外海水師由福山口進兵迎擊
以堵逆匪出洋之路又瓜州京口爲南北咽喉東壩內通蘇常二
府均宜重兵防守又據御史黎吉雲奏請派兵防守江北及河北
各處添派浙江水師提督葉紹春總兵陳世忠堵守鎮江丹陽並
請於揚州及清江浦並王家營等處厚集兵力收船築壑阻賊北
竄各等語已諭令怡良黃宗漢迅調葉紹春等帶兵卽赴福山江
口接應矣賊船逼近江甯所有瓜州京口東壩及下游一帶均關

緊要大江以北及黃河南北兩岸亦應豫爲籌防著楊殿邦楊文定文藝楊以增各就地方情形仍遵前旨嚴密籌防並著隨時知照向榮合力夾擊以期互爲聲援又順天府府丞張錫麈奏請明懸賞格有能團練丁壯殺賊立功者文武舉人賞給進士貢監生員賞給舉人軍民人等賞給把總外委等語著卽酌量出示曉諭廣懸賞格以勵人心又據禮部代奏額外主事尹耕雲擬請亟籌火攻一摺賊船林立江面最利焚燒屢次寄諭諄諄今尹耕雲摺內所陳尤爲詳細著該大臣等體察籌辦尹耕雲等原摺著鈔給閱看將此由六百里各諭令知之○諭據奕湘奏皖城失守逆匪順流東下恐其占踞礮臺竄出海外勾連海匪亟宜豫爲防範請飭調外海水師守禦江蘇福山江口以堵逆匪出洋之路等語見在賊逼近江南城大兵單急待援應著怡良黃宗漢飛飭提督葉

紹春總兵陳世忠卽統帶水師鎮將挑選精壯兵丁駕駛戰船由福山口進兵迅赴上游迎擊以資救援怡良距浙省較遠黃宗漢接奉此旨卽行就近飛調毋得往返札商致稽時日將此由六百里各諭令知之○祥厚陸建瀛福珠洪阿霍隆武奏賊勢猖獗益甚本月二十八日膽敢分水陸兩路直犯江南省城臣祥厚臣陸建瀛等立卽登陴督防二十九日黎明陸路一股先到攻打南城聚寶門又分擾水西旱西儀鳳太平洪武通濟等門槍礮橫施自朝至夕狂悖不可名狀我兵旗綠各營數不滿萬幸皆誓死固守擊斃逆匪約千餘名始行退下詎三十日該逆水路一股衝突而至太平儀鳳兩處勢更危迫查江南旗綠各營兵止此數前調山東兵二千名旣無到信向榮琦善等亦無赴江的耗不奉恩旨速催恐金陵危在旦夕得旨初五日接閱周天爵奏報知江南勢甚

危急已速飭向榮等赴援矣並有諭祥厚等寄諭不知能接到否該署督等嬰城固守多守一日可待援兵速到合力攻擊朕惟有仰籲 昊天亟救萬人莫赦一人之罪譴也○壬午諭軍機大臣等琦善陳金綬統帶重兵假以事權原期其督催諸將迅速應援爲朕稍釋南顧之憂乃明知羸馱不敷不肯用夫扛解運藉詞遷延並陳金綬亦牽制不進以致安慶失守貽誤事機今江甯望援甚急若再不能如期應援設有疏失江南半壁又遭塗炭該大臣等自問當得何罪陳金綬著仍遵前旨星速渡江直抵江甯以救危急沿江船隻豈不能設法購覓卽木筏亦可從上游浮渡若全不豫籌又以無船藉口安用爾大帥爲耶琦善統率大兵著卽兼程前往爲陳金綬接應毋得再有遲誤陳金綬抵江甯時如向榮大兵已到卽著會同合力夾擊不惟立解省城之圍並可殄滅賊

氛以慰朕念也將此由六百里加緊各諭令知之○諭楊文定馳奏軍情緊急乞師防剿一摺賊匪見犯江甯楊文定擬在揚州駐紮設立糧臺適中轉運惟鎮江爲蘇省門戶而東壩直達蘇州皆爲緊要該撫務須分派重兵小心防守毋任賊匪闖入所調浙江精兵二千旣已飛咨該撫豫爲揀派著卽飛催來蘇幫同剿捕近來軍營惡習往往藉防堵爲名株守一隅各顧疆圉以致逆匪肆無忌憚擾及數省若不力圖補救東南半壁尙可問乎江甯待援甚急該撫亦知以剿爲防若援兵旣集而蘇常一帶布置已妥該撫卽帶兵前進以解江省之圍更爲妥善前有旨令吳健彰雇募上海商船由海入江以資攻剿該道如已雇就卽著該道就近派文武員弁迅速帶往京口等處聽用毋庸往返稟商又稽時日見在海運事宜緊要倪良燿務當督率妥速辦理俟經手事竣再行

奏明赴任將此由六百里加緊諭知楊文定並傳諭聯英倪良燿
吳健彰知之○諭寄諭漕務總督楊殿邦等前有人奏江蘇豐縣
匪徒皇甫棠夥黨甚多分布水路要隘屢經地方官查拏未獲當
降旨交陸建瀛楊文定等派員帶兵嚴密查拏茲復有人奏豐縣
匪徒皇甫金又名皇甫棠聚眾數百在銅碭豐沛一帶搶掠等語
該犯見在是否就獲未據陸建瀛等奏報粵匪已竄擾江甯是淮
北一帶最爲喫緊所有本地土匪必須嚴密查拏以杜勾結該督
等務須相度機宜或鋤其首惡散其黨與或設法招致責令殺賊
立功贖罪著卽斟酌辦理毋使蔓延原片著鈔給閱看將此由四
百里各諭令知之○兩江總督陸建瀛等奏江甯布政使祁宿藻
辦理籌防積勞病故得旨使陸建瀛不退至省垣祁宿藻或可稍
盡丹忱皆由該革員畏葸喪膽所致○以倪良燿爲江甯布政使

調查文經爲江蘇按察使以常績爲甘肅按察使

由鎮迪道遷

○命在

籍前任兵部侍郎孫葆元浙江巡撫梁寶常等辦理直隸團練事宜前任廣西巡撫周之琦內閣學士祝慶蕃廣東布政使王庭蘭等辦理河南團練事宜前任山西巡撫梁萼涵江蘇布政使李璋煜河南布政使王簡浙江按察使孫毓澹湖南按察使王允中四川按察使劉耀椿等辦理山東團練事宜○癸未 上詣 文廟 繹奠禮成 御彝倫堂更衣 親臨辟雍講學王公衍聖公九卿大學士詹事起居注官入侍至聖後裔五經博士各氏後裔及學官進士舉人廩生貢監生等園橋肅立 上賜講官坐大學士裕誠祁寯藻進講四書國子監祭酒訥爾濟龍元億進講書經講畢 上宣御論時王公百官及聽講進士舉人廩生貢監生等跪聆 聖訓畢王以下各官行三跪九叩禮祭酒司業率學士諸生

謝恩禮成恩賚進講大學士祭酒並衍聖公聖裔後裔國子監官
觀禮進士舉人廕生貢監生等有差廣太學乙卯科鄉試中額十
五名○諭內閣原任協辦大學士晉贈太師大學士杜受田於道
光十六年蒙 皇考簡用上書房師傅與朕朝夕講貫發明唐虞
三代心傳十餘年開教誨不倦朕親承啟迪獲益良多卽位後諮
訪古今政治利弊暨民生疾苦無不盡心匡弼獻納嘉謨儻能久
在左右於時事艱虞尙冀多所補救本日臨雍講學追思曩日討
論之功宜沛恩施以昭篤眷杜受田之父杜壻前已賞加禮部尙
書銜著再加恩賞食全俸杜受田靈柩尙未歸里著派惇親王奕
諒前往賜祭一次用示朕崇儒重道之至意○周天爵奏逆匪竄
入長江連破楚皖省城直犯江甯如入無人之境其故賊踞上游
水陸並進蔽江而下我兵以下游當之無不立破此形勢之一誤

也論戰之法陸路用車馬水路用舟楫洞庭長江上下木簀船隻俱爲賊有聚泊漢口多時匪徒號稱數十萬持滿而發而我兵總計不過數萬即使聚集一處全力迎擊已難制勝乃自黃州以下至金陵沿江千餘里要隘數十處更無木簀戰艦但以陸路弁兵分守各要隘或千餘名或數百名零星散布如同兒戲一旦大隊賊來如風掃葉此機宜之一誤也臣竊觀我朝自用兵以來未有昧形勢失機宜如今日一誤再誤之甚者見在賊犯江甯絕我運道阻我鹽關一切糧米課銀盡資盜糧京師倉儲庫項官俸兵糧仰食江南者十之八九儻江省再失賊必畫江而守以彼強富之徒犯我空虛之境賊勢紛竄南北靡定不可不統籌全局豫爲防剿之計亟請特簡親信重臣統帶大兵由中路進取一面檄調廣東水師義勇前後兩路夾攻會剿一面團練山江皖豫四省連疆

勁勇保護黃河各隘口遏賊北竄之路臣與呂賢基等統帶兵勇左右其閒以滅逆醜而彰天威惟安徽巡撫任重事繁日不暇給加以收集散兵安撫人心在在均關緊要臣年衰朽承辦江北防勦事宜吏治兵機勢難兼顧應請旨簡派明幹大員獨任其事俾臣得專責成所有團練事宜臣已遵旨行知四省附近連疆各地方官認真辦理又奏臣竊卽安徽全局計之惟廬州形勢據巢湖上游與正陽巨鎮相爲犄角居重馭輕應請遷省於此將安慶改作府城駐紮總兵一員以資水陸防禦伏祈聖裁正繕摺聞適接候補知府牛鎮等稟賊於十九日擾及池州府城卽於是夜失守該逆等搶掠後於二十二日上船二十三日全行退出各等語臣當飛札總兵王鵬飛將截畱舒城之山東官兵一千二百名帶赴省城相機辦理並於闡江磯上游擇要防守遏其歸路旋又

報江浦驛文報不通江甯被圍危在旦夕亟請飭下山東撫臣李

德迅赴曹州劉家口一帶彈壓北路以防教匪伺釁而動臣與呂

賢基等一面團練招募並截畱各路官兵以防北竄宿徐一帶

上諭軍機大臣等周天爵奏統籌全局形勢防剿機宜一摺據稱

安徽巡撫任重事繁勢難兼顧自係實在情形惟准徐一帶亦關

緊要所有江北防堵該署撫卽督同地方官認真妥辦一俟呂賢

基到皖會同籌辦一切務期各郡互相保衛毋令奸匪潛蹤又據

奏池州府失守該城文武如何下落並該藩臬等下落一併確查

具奏另片奏廬州形勢較安慶扼要請遷省城等語俟李家端到

任後察看情形會同妥議具奏將此由六百里諭令知之○命周

天爵仍以兵部尙書銜辦理江北防剿事務以李嘉端爲安徽巡

撫田刑部左○甲申陳金綬勝保奏臣等奉命馳往安徽截剿逆

撫侍郎遷

匪先經會同琦善挑選直隸精兵四千名於正月十九日自信陽啟程因楚境山路狹窄難行又遇陰雨路滑每日晝夜趨程不及百里見在已過蘄水縣境距安徽省城僅五百餘里路漸平坦臣等極力分督前後各隊官兵迅速兼程察探逆匪所向併力追剿不敢稍事遷延其在後吉林黑龍江馬隊未據報抵何處應由琦善統帶接應如有需用隨時飛調勝保又奏此次安徽進剿之兵四千名除防守營盤衛護糧臺外出戰精銳不過二千餘名率皆未經戰陣恐難深恃臣日與在營諸將弁及各營兵丁講求陣法激勵士氣以誠意相感使上下不致睽隔陳金綬久歷戎行惟見其年逾七旬於行軍紀律駕馭人才之方未能十分周顧仰懇皇上密飭該提督詳慎商榷謀定後戰攻其所必救備其所必攻以操勝算似於大事有濟上諭軍機大臣等陳金綬勝保奏帶

兵將入皖境沿途情形一摺該提督本月初二日所發奏報甫經行抵蕪水一何濡滯若此見在江甯危急陳金綬勝保卽著星速馳赴江甯與向榮合力援應前因該提督兵力尙單曾諭琦善添撥官兵四五千名一併前往江南交該提督調度此項兵丁如尙未到著卽迅速迎提務令兼程東下以資攻剿琦善究在何處豈仍駐應山尙未前進耶江南之與湖北孰重孰輕若旣紆道行走又復沿途耽閣是直欲以無賊之區爲藏身之固豈大臣公忠爲國之心乎琦善所帶之兵除撥出外尙復不少昨已諭令駐紮江北浦口一帶爲陳金綬接應並著陳金綬勝保飛催前進至該提督久歷戎行於一切用兵之法自必悉合機宜仍與勝保和衷商榷計出萬全將此由六百里加緊各諭令知之○諭文藝奏賊匪東下京口情勢緊急一摺逆匪水陸並進偪攻江甯其下游瓜州

鎮江各口岸防堵均爲緊要該副都統奏稱金山京口北固山雖均分撥防兵而兵力甚爲單薄自係實在情形向榮所帶大兵正月杪已由九江覓得船隻計此時諒可駛到江甯見在江甯待援急迫一俟水陸大兵俱到可望解圍卽京口等處亦可藉以無虞該副都統惟有督同在城文武率領旗營各兵相機守禦以待援兵仍與楊殿邦楊文定等和衷商榷俾賊蹤不至竄入以保嚴城將此由六百里加緊各諭令知之○諭勝保奏行人楚境查有著名土匪逞兇肆搶並開單呈覽據稱湖北黃陂縣屬大城潭相去二十餘里有金鼓蓮會匪結黨千餘人潛處金鼓山中蓄置槍礮伺隙鳴鑼搶掠地方官不敢入穴搥渠當粵賊破武昌府時該匪有潛遁消息接濟之事又黃岡縣舊街附近地方有王姓一門嘯聚數百死黨乘省城破後逞強搶奪並殺傷多命被害者畏不敢

報恐地方官不行拏辦反致加害等語此等亡命之徒膽敢鳴鑼聚眾肆行搶殺若不及早撲滅必致養癰貽患著張亮基等按照單開姓名住址選派文武幹員帶兵前往嚴密查拏盡法懲治儻查辦不力致令該匪蔓延釀成大患朕惟該署督撫是問原單著鈔給閱看將此由六百里諭令知之○候補四品京堂勝保奏報謝恩賞並與陳金綬和衷襄辦軍事得旨和衷辦理亦可增汝識見朕素悉陳金綬樸誠勇往必能與汝相商此摺與陳金綬同看○命在籍前任閩浙總督劉韻珂廣東巡撫黃恩彤江蘇巡撫傅繩勛湖南巡撫馮德馨等督辦山東團練事宜○賞衍聖公孔繁灝太子太保○以羅惇衍爲刑部左侍郎雷以誠爲左副都御史

由太常寺少卿遷

○以奎綬署安徽布政使

由應鳳道署

調張印塘爲安徽按

察使

由雲南調

○准截留浙江委解雲南銅本銀十萬四千兩備安徽

籌防支放○乙酉諭軍機大臣等據李德奏接據帶兵赴皖之參將遊擊等稟稱所帶官兵經安徽巡撫派令在北關外馬山駐紮地勢腹背受敵正月十七日賊匪蜂擁而至參將嵩瑞等分兵攻擊正在相持忽北門擁出逆匪千餘圍逼營盤拋擲火器互相殺傷官兵衝圍而出嗣又攻戰三日一夜裹糧已盡見在四路覓食再圖進剿等語當安慶失守時賊黨竟伏城中裏應外合以致該參將等孤軍無援甚至無糧接濟枵腹持戟殊出情理之外所有山東萊州營參將嵩瑞壽張營遊擊馮化青所帶兵丁見在散往何處著周天爵迅速查明酌量接濟或飭赴軍營或畱該省防禦不至以有用之兵置之無用之地至新任巡撫李嘉端到任尙需時日周天爵見署巡撫若久駐宿州於省城重地不足以資控馭仍宜到省查看或令臬司張印塘先往彈壓知府知縣各缺亦應

派員署理使沿江一帶不至空虛土匪不敢乘機搶掠以衛閭閻
又據周天爵馳奏統籌全局各摺片處處設防家家能戰固屬善
策惟千有餘里鞭長莫及一時何能措辦該署撫先就皖省實力
整頓認真團練俾人人俱成勁旅土匪無從竊發一俟大兵到齊
卽當馳抵江甯會同截擊方爲不負委任至官兵過皖俱備金陵
之用萬不可任意截畱所有前畱山東官兵五百名仍著馳赴江
甯交向榮調度據奏吉順統兵三千名已抵皖城著卽飛催渡江
援應江甯萬勿遲誤此外如有續到官兵亦卽飭赴江甯應援不
可遲緩此次請籌餉銀見在部中籌畫該署撫雇勇無多並未接
戰務須撙節動用無稍浮糜總兵王鵬飛不知去向著與安徽藩
臬道府文武各員一併查訪明確據實具奏如有怯懦無能先期
逃避情罪重大例應嚴懲者均著奏明請旨將此由六百里加緊

諭令知之尋周天爵奏總兵王鵬飛已正法報聞○諭本日據祥厚等馳奏逆匪日益猖獗見在極力防守一摺據稱逆匪水陸並進自前月二十九至本月初二等日礮斃該逆千餘名復調回東西梁山師船擊斃水路各逆亦不下千餘名逆匪抵死抗拒見仍攻打各城並盤踞城外天后宮靜海寺等處懇飭大兵速赴江南以解重圍等語琦善陳金綬帶兵由黃州黃梅一帶前赴江南向榮二月初間亦可趕到該大臣等務當督率在城紳民兵勇竭力固守以待外援俟大兵雲集內外夾攻必可解圍賊匪詭計百出總宜嚴防奸細以杜內應將此由六百里加緊諭令知之○以劉裕鈺爲安徽布政使由四川建昌道遷清盛爲雲南按察使由甘肅蘭州道遷○遣程高采發新疆充當苦差龔裕發新疆效力贖罪○丙戌諭內閣朕勤求治理念切疇咨疊經下詔求言凡九卿科道有言事之

責者於用人行政一切事宜俱令封章密奏俾民隱得以上聞頻年以來言路宏開於國計民生不無裨益惟近日各衙門不應具奏之員亦皆繕封章由堂官轉遞殊屬非是該員等本無言責如果確有把握可見施行亦應具呈各該堂官酌定據呈代奏今該員等輒自具寫書某人跪封跪奏字樣是名爲遞奏實與自行陳奏無異朕虛懷納諫原不肯以細故相繩惟體制攸關亦不可漫無區別嗣後各部院堂官務當恪遵定例凡不應具摺而有懷欲白者俱令具呈聲明由各該堂官據情代奏庶於集思廣益之中仍不失設官分職之義然或因有此旨遂相率緘默不言則又非朕好問察言之本意也將此通諭知之○命在籍前任兵部侍郎戴熙內閣學士李品芳朱瀾湖南巡撫陸費瑤督辦浙江團練事宜○丁亥春分朝 日於東郊○以孫銘恩爲內閣學士

由詹事遷○

戊子諭內閣各直省綠營額設兵數統計六十餘萬之多如果該管各官認真訓練俾技藝日精自足備干城之選見在逆氛未靖各省官兵俱有徵調而存營兵丁尙復不少著各該督撫提鎮嚴飭各營將弁將存營官兵裁汰老弱挑選精壯定期分練合操其應差兵丁亦必照常操演仍由各督撫提鎮頒給章程明示賞罰每月委員會同校閱儻有老幼充數技藝生疏或查有空糧情弊卽著從嚴參辦無稍瞻徇其各省駐防官兵著一律照此辦理該將軍督撫等務當激發天良力求整頓使各營官兵悉成勁旅以副朕整飭戎行之至意將此通諭知之○諭軍機大臣等前據勞崇光覆奏查明逆賊洪秀泉馮雲山韋政祖墳先經廣東花縣廣西桂平縣發掘稟報有案因思該逆等蹂躪四省擾亂三年其戾氣所鍾非發掘鏟除不足以洩神人之憤更恐羣逆詭詐假託姓

名所掘墳墓或未必皆真其從逆著名要犯如楊秀青羅大剛等亦俱兇狠異常其三代墳墓尙未據該督撫續行查出發掘著葉名琛柏貴勞崇光密飭各該州縣明查暗訪務得該首逆及從逆諸三代確實墳墓悉加掘毀並其坐山後脈概行鑿斷以消逆燄而懲大憝將此由五百里各諭令知之○諭陸應穀奏襄陽土匪漸就肅清馳赴歸德防堵一摺襄陽土匪聚眾滋擾經陸應穀派總兵柏山帶兵馳往督同湖北員弁勦辦先後捕獲一百數十名並將著名匪犯擒獲正法餘匪紛紛逃散道路已漸肅清惟首要各犯尙未就獲羅繞典見駐襄陽著卽嚴飭員弁督率兵勇嚴密偵緝務將首要郭大安孫貴等及其餘夥黨一併擒獲按律懲辦毋畱餘孽所有豫省派往弁兵著卽撤回仍飭各文武於交界處所認真巡緝毋令此拏彼竄見在逆匪竄擾江甯如安徽鳳潁江

南徐州等處均與歸德接壤陸應穀卽馳往該郡相機籌防尤宜嚴拏奸細勿令賊匪溷迹本日據副都統阿彥達奏河南北向多盜賊見在巡撫總兵均辦防堵並無大員鎮撫等語著陸應穀遴派明幹大員於河南北扼要處所駐紮彈壓並飭辦理團練之紳士團集鄉民與官兵互爲聲援以資保衛而靖奸宄將此由五百里諭令知之○先是太僕寺卿李維翰奏請暫停養廉以充軍餉命軍機大臣等會同該部議奏至是議上武職自三品以上停給二成文職自一品至七品暫給廉銀六成八品以下免其停扣此項銀兩令各該督藩司覈明數目提出另存由督撫專摺奏報聽候撥用俟軍務告竣仍復舊額從之○陳金綬勝保奏臣等於初六日入安徽宿松縣境卽於是夜抵太湖縣據該處防堵委員等稟稱賊於正月十七日由水路竄至安慶省城夜間被賊轟開城

門因而失守該匪卽於次日乘船東下已到東西梁山地方伏思
安慶省有防兵數千不意賊到逾時卽已失守臣等雖連日極力
趙程前進竟致救援不及曷勝憤恨查東西梁山地近江甯太湖
縣距江甯對岸之江浦縣以小路捷徑覈計尙有七百餘里當卽
咨會向榮一面飛札沿途州縣並派委幹練將弁分投查探賊蹤
一面督帶官兵無分兩夜星馳直赴江浦一帶迎剿截擊臨時審
度何處緊要相機會剿得旨汝等止能在江北截擊不克渡江如
有船隻仍應赴江南救援爲是○己丑諭軍機大臣等祥厚等馳
奏賊圍江甯十日援兵不至請旨飭催一摺覽奏不勝焦急前因
賊船東下疊經降旨諭令向榮陳金綬迅速統兵兼程馳往金陵
應援何以至今尙未趕到向榮所調湖南船礮江南船隻據張亮
基張芾先後奏到業已運往九江聽候撥用是船隻早經應手若

順流東下不過旬日即可直達金陵該大臣見在行抵何處未據奏報殊不可解陳金綬前日奏報於本月初八日始抵太湖距江省較遠何以濡滯若此著卽遵疊次諭旨星速帶兵前往應援江南爲東南重地若以待援不至致有疏虞向榮陳金綬其能當此重罪耶將此由六百里加緊諭知向榮陳金綬並諭勝保知之○諭祥厚等奏賊圍十日奮力固守請飭催援兵一摺逆匪聞省城該大臣等激勵旗綠各營晝夜嚴防並募本城勇壯一萬餘人協同守禦已歷十日並擊斃逆匪不下二三千人足見兵民一心布置嚴密各路精兵計日均可趕到該大臣等務當督同在事文武兵勇紳民竭力固守一俟大兵雲集卽可內外夾攻殲茲醜類逆情詭譎務須隨時嚴查奸細以杜內應卽援兵到後仍宜加意嚴防不可稍形鬆懈將此由六百里加緊諭令知之○命在籍前

任甘肅涼州鎮總兵官楊祿等督辦直隸團練事宜○庚寅河南巡撫陸應穀奏據永城縣知縣呂贊揚稟報安慶失守宿蒙亳壽等處捻匪蠡擁四起不下二三十股人數多寡不等又臨淮之磨盤山聚有大股捻匪數千人肆行劫掠查永城縣與安徽亳州江南陽山蕭縣毗連爲豫省東路門戶見在髮逆竄入江皖該處相距甚近防堵喫緊乃復有捻匪乘機蠢動潛入滋擾深恐勾結爲患前調官兵僅有二千餘名尙屬單薄必須添派精兵前往以備堵禦信陽光州防兵亦屬無多一時未能輕動臣再四籌酌惟南陽地方見均安靜原派在郡防堵之青州駐防官兵一千名陝甘綠營官兵七百五十名可以改撥臣已分別咨調各令星夜馳往分赴歸德永城擇要駐紮臣卽於二月十一日起程馳赴歸德察看情形相機辦理再貴州提臣善祿奉旨畱在南陽幫辦防堵自

下楚匪全股東下宛郡無事而歸德一路正當喫緊可否飭令善祿卽行移紮永城幫辦防剿事宜 上諭內閣安徽宿州蒙城亳州壽州等處捻匪四起臨淮之磨盤山聚集多名肆行劫掠河南永城縣與亳州毗連情形喫緊該撫見已調撥南陽防兵趕赴歸德永城擇要堵禦並親往歸德察看督辦著卽迅速籌防相機截剿貴州提督善祿前飭留駐南陽防堵該處見均安靜著趕緊前赴永城駐紮會同該撫妥速辦理○命在籍前任江蘇布政使程煥采大理寺卿邢福山等督辦江西團練事宜○命在籍前任漕運總督李湘棻江西巡撫陳阡等督辦山東團練事宜○辛卯諭內閣前因軍務河工用度浩繁經內外大小臣工條陳籌款事宜凡有可採擇或須斟酌之件當交部臣詳議並須廣爲諮詢者特交大學士九卿等會議以聞總期有利無弊於國計民生均資裨

益其不可行者當經部臣奏駁或奏上時朕洞鑒其弊特旨停止近日戶部請飭京師商賈捐輸布彥泰德瑛前後奏請酌收商稅黎吉雲奏請按戶輸錢雖爲急籌國用起見惟思京師商賈資本不盡充裕且有在本籍業經捐輸者至各省錢糧地丁並徵善爲定例若再按戶徵收事類重科且恐吏胥滋擾重累吾民朕夙夜思維無濟時艱徒妨政體甚無謂也況近來中外臣民呈請捐貲助餉者絡繹不絕朕復躬行節儉可冀漸次充盈何必徧事接求致令愚氓轉生疑惑本日據禮部尚書奕湘內閣學士孫銘恩左副都御史文瑞給事中吳廷溥御史長秀陳慶鏞編修卓樸具奏京城內外見在商民情形各摺所稱銀錢鋪戶見多關閉或係無業之徒布散謠言藉端滋擾或奸商乘機歇業貽累他人亦恐因時議商捐商稅等項道路傳聞以致羣相疑懼朕念切安民豈可

令京師首善之區商民失業所有布彥泰德瑛黎吉雲徵收鋪銀計戶收錢等摺片及戶部勸諭京師商賈捐輸各條均著毋庸置議其餘交議之件亦著該部斟酌利弊分別妥辦至鈔法由來已久本朝初年亦行之近日諸臣紛紛陳請此事原以濟國用之不足既非廢銀用鈔亦非責商繳銀部庫出入通行不令稍有畸輕畸重正當行之久遠俾天下咸知鈔爲國寶與銀錢並重部庫收發之律既足示信而祛疑而民間以漸流通亦可利用而行遠仍著戶部妥議速行其各銀號錢鋪所用私票仍令照常行用如有造謠生事謂須禁止民間錢票及以鈔發商勒令交銀等說者該旗營地方各官立即嚴究造謠之人拏獲懲辦並著步軍統領衙門順天府五城卽行出示曉諭京城內外諸民各安本業貿易如常毋得聽信浮言自相驚擾儻有不法匪徒行使假票糾約多人

喧鬧各店鋪恃眾嚇詐搶奪或昏夜擁擠不散者該地方文武衙門立即嚴拏送部加等治罪其各錢鋪無故關閉有心誑騙者查明拏獲從重懲辦並將保人一併照例懲治庶足以儆奸蠹而靖閭閻銀米皆民間日用所需二者均重京城東接通州因每年漕船提壩時恐有回漕等弊例禁倉米出城其內城前三門原不禁其出入近聞米價稍昂亦恐有妨民食著各該衙門通行出示除照例應行查禁各門外其前三門毋得禁米出城各鋪戶照常售賣並不得居奇致干法紀又戶部見因外省撥款未能如期解到奏請將俸銀分別暫停一年朕思王公大臣俸入素優卽暫停給發事尙可行其文職四品以下武職三品以下各員仍著戶部將本年春季暫停俸銀照數給行補領並著發內庫帑銀五十萬兩交部庫收存以備支放俸餉要需並著步軍統領衙門順天府五

城將此旨刊刻徧行曉諭○諭國家設官分職體制相維大小臣工同朝共事無論事關重大議貴和衷卽尋常會辦事宜亦應虛心商榷前據惠親王等奏派兵籌餉一摺特派大學士軍機大臣九卿會同議奏原以軍國重情冀收集思廣益之效與議諸臣宜如何各抒所見爲朕分憂豈容意氣相陵致失大臣之體本日據左副都御史文瑞奏稱會議時以見有暫就之術商之戶部尙書孫瑞珍該尙書述其家貲若干出語粗俗形同市井無賴至有賂呪之言等語朕於諸臣以禮相接推誠相待從無逆詐億不信之心前因御史富興阿等陳奏朕以其摺內有應議之條是以發交部議迨孫瑞珍等自陳產業數目朕亦不疑其隱匿諱飾文瑞於會議時如果平心靜氣婉語相商孫瑞珍何至遽行憤激卽孫瑞珍以文瑞詞色凌厲亦何必遽出矢言且古人所謂同寅協恭者

文瑞豈未之前聞而竟以議論牴牾直斥該尙書爲市井無賴登諸奏牘將使朕於萬幾之暇更爲諸臣排難解紛耶孫瑞珍文瑞均屬不知大體著一併交部議處文瑞所稱與和淳另籌鈔法章程等語著卽具摺奏聞毋得空言徒滋辯駁懍之○壬辰諭內閣惠親王惇郡王奕誼恭親王奕訢奏陳時務一摺所陳儲備鉛藥及安撫難民籌裕倉庫各條均不爲無見而嚴門禁整器械訓練在京駐防官兵尤爲切時急務禁門出入疊經諄諭該管大臣飭令值班官兵嚴密稽查乃近年仍有拏獲攜帶腰牌頂名冒替之案總由各處當差人等將本身姓名年貌腰牌雇覓民夫攜帶充當若稽覈稍疏則閒雜人等不免溷迹何以肅宮禁而嚴守衛著前鋒統領護軍統領總管內務府大臣嚴密稽查如有前項弊端卽行拏獲究辦見在辦理章程或尙有未盡之處著會同妥議具

奏至整飭武備前已嚴諭在京各旗營時加訓練兵力既足亦必須器械堅利始足以資操防近來該管王大臣點驗軍器仍不免虛應故事其查閱所至不過接收冊簿於各營器械何處整齊何處損壞茫然不知以致所屬相率效尤殊非簡覈軍實之道嗣後著點驗軍器王大臣認真查驗除隨時按限修理外儻查有未逾年限損壞缺失者卽將該管官嚴行參處毋稍徇隱各省駐防官兵昨已諭令該將軍副都統等勤加操演其直隸山東河南山西等省駐防旗兵拱衛京師尤關緊要著各該管大臣仍遵前旨實力訓練並將火藥軍器馬匹一律整飭務使各營兵丁悉成勁旅足備緩急之用以上各條均係該王大臣等隨時應辦要務其各振刷精神力求實效無負朕諄諄訓誡之至意○楊文定奏臣接據探報江甯省垣於十一日被賊偷挖地道暗用地雷轟開儀鳳

門而入一云城內有漢奸放火爲號賊卽由火起處用蜈蚣梯爬入省城失守等語臣隨與副都統文藝會商鎮江止一空城且形如釜底防守甚難況各險隘派兵分防均嫌單薄不若聚於扼要處所猶堪一戰查山背頭係從龍潭句容來鎮總路當將城內旗兵八百名山東官兵四百名調赴江甯之狼山營兵三百名一併飭赴該處紮營駐守由文藝統帶當此時事萬難臣仍竭力支撐保此瓜口使大軍及文報可通以待援兵大集伏乞嚴飭各大臣飛速前來極力勦洗以圖克復上諭楊文定奏探報江甯省城失守等語覽奏不勝憤恨若使援兵早到何至旬日之間遽行失守見已命怡良補授兩江總督星馳前往楊文定駐守鎮江著卽暫署兩江總督事務聯英著暫行辦理江蘇巡撫事務向榮昨已繞至六合刻下諒已渡江著卽相機攻勦並督率前調師船水陸

扼要與楊文定等合力夾擊毋令蔓延所有江南被賊擾害各州縣應徵新舊錢糧著楊文定迅卽查明奏請蠲緩其附近地方居民防堵方殷難安耕作著一併查明分別奏請恩施○諭楊文定奏查明艇師各船接仗情形據實舉劾一摺前經陸建瀛奏福山鎮總兵陳勝元陣亡業經降旨賜卹茲據楊文定查明此次接仗太湖協副將劉長清籍詞收集潰兵潛回上海福山鎮標千總施洪彥隨同陳勝元船隻進剿膽敢將錨纜斬斷與水手等各跳小船逃走喪心病狂不法已極施洪彥著查拏務獲卽行正法劉長清著卽革職仍責令帶兵效力儻再不知奮勉卽著嚴參治罪其接仗出力將弁亦應量加鼓勵太湖協副將員缺著周鼐補授所遺蘇鎮標遊擊員缺著張攀龍補授千總王之敬鞠耀乾均著以守備升用先換頂帶並與千總藍新恩把總鄧應魁記名把總張

其忠均著賞戴藍翎○諭色克通額等奏科布多所屬各旗汗王貝勒貝子公扎薩克台吉等見因逆匪滋事呈請捐銀以備軍需等語杜爾伯特土爾扈特汗王等因聞逆匪滋事呈請捐銀九千兩情詞懇切朕深欣悅惟念蒙古生齒日繁藉資度日若賞收此銀朕心實所不忍況各省大兵將到諒此逆匪不日即可殲除所捐之銀毋庸賞收以示朕嘉獎體卹蒙古臣僕之至意○諭軍機大臣等楊文定奏報探聞江甯省城失守等語覽奏憤恨之至據稱逆賊偷窆地道而入一云城內有漢奸放火爲號賊卽由火起處用蜈蚣梯登城可見賊黨密布城中未能先事稽察以致失守該逆詭譎伎倆積慣用此正不可不處處嚴防見授怡良爲兩江總督飭令督帶前調之閩兵二千名星馳就道然到尙需時楊文定與文藝因鎮江不能防守匯集兵力駐守山觜頭地方並將城

內錢糧移至丹徒鎮亦止可如此辦理所有句容至丹陽東壩至蘇州各陸路務須節節堵截本日復飛催向榮趕緊赴援楊殿邦前奏向榮已抵六合上游刻下諒已渡江著該漕督卽與向榮南北聯絡策應嚴防江口斷不可致有隔阻文報亦須設法郵遞勿令遲誤將此由六百里加緊各諭令知之○諭寄諭欽差大臣琦善等本日據楊文定奏江甯省城於本月十一日失守覽奏曷勝憤懣前曾疊次諭令向榮陳金綬趕赴金陵不料救援不及一誤至此昨據楊殿邦奏探聞向榮已繞赴六合上游儻因江浦失守賊踞要口著卽督兵迅擊剋期渡江相機攻勦使逆匪不敢窺伺蘇常仍可與江北聲勢聯絡以圖克復見在賊踞江甯江北要隘最關緊要楊殿邦駐紮瓜州兵力單弱周天爵扼守淮徐亦難兼顧琦善陳金綬督帶重兵旣不及援救江南則江北一帶是其專

責必須嚴密防守內戢土匪外遏賊匪北竄之路見在黑龍江馬
隊已抵宿州與前隊吉林官兵均當擇要布置以備攻剿並將見
在如何辦理情形迅卽馳奏前次疊降諭旨該大臣等諒已懍遵
朕亦不復多言矣將此由六百里加緊各諭令知之○周天爵奏
自髮匪猖獗疊陷楚皖省城江北一帶黃河南北間風響應者結
成大股捻匪或數百人或千餘人肆行搶奪放火殺人捻首牛汶
禮臣已擒獲梟示徐州黃河以南人心稍定仍有匪黨劉錦城杜
汝祁等嘯聚倡亂臣又派宿州城守兵五十名義勇四百名前赴
定遠九子集十八里岡一帶剿辦又徐郡黃河南北淮郡清江上
下擒匪私梟伺釁而動到處搶掠當札徐州鎮速帶營兵彈壓鈔
剿並飭蕭縣都司多帶兵勇先擊瓦子口棠林集一帶著名股匪
臣申明團練章程民間有縛斬殺人放火之犯隨時給與功牌鼓

勵使紳民協力同心互相保衛一俟侍郎呂賢基到皖臣再會同籌備一切遵照辦理又奏據江南淮徐道王夢齡稟靈璧縣擒匪劉增謙與泗州舊匪李三鬧分兩股勾結同縣之馬魁英孫漢衢各聚數百人在靈璧之會塘溝搶奪米車散給貧民盤踞孟山至漁溝地方肆行搶掠該處與淮甯縣交界亟須派兵堵緝惟時因蕭縣張山集地方有大夥擒匪強劫滋事已派出兵勇二百五十名前往擒捕刻下存城兵勇無幾難以再撥請由臣派兵前往拏辦等語當札署總兵聶金鎮帶兵迅赴會塘溝孟山漁溝一帶痛勦一面札飭蕭縣都司折赴張山集地方嚴行搜捕以靖地方上諭淮郡清江上下擒匪私梟伺釁而動經該署撫嚴札鎮將帶兵彈壓鈔勦所辦均合機宜當此人心不靖勦洗土匪鎮撫居民卽著周天爵相機妥籌一切布置朕斷不遙制致有掣肘其出力

員弁紳民兵勇卽照軍功優請獎勵以作士氣總期奸宄斂迹保衛居民以副委任勉之望之至山東與安徽江南毗連各處著隨時知照李德一體嚴防聲勢聯絡是爲至要將此由六百里諭令知之○諭見在兗沂曹一帶巡防大河千里處處險要該撫慮事周密想已妥爲布置竭力設防其上鄰河南下接江蘇各州縣應如何合力防守仍宜隨時知照楊以增福濟一體稽察堵截山東一省關繫全局朕惟李德是倚勉之望之陸應穀已命馳往歸德一帶此時當可啟程亦當與之聲氣相通以期聯絡將此由六百里諭令知之○以怡良爲兩江總督由福州將軍遷○癸巳諭軍機大臣等據倪良耀奏海運漕米遲滯請勒限嚴參一摺江浙海運前有旨令倪良耀總司其事疊次飭部飛催正擬此時已可開船出洋何以遲至今日始奏稱漕米遲滯勒限嚴催耶該藩司如果及早

催徵將延誤之州縣先行嚴參懲處亦何至相率效尤輒以軍書
旁午花戶不前藉口推諉見在江浙各屬運未到滬者爲數尙屬
無多似此觀望遷延必致貽誤正供咎將誰歸倪良耀見已調補
江蘇布政使責任更無旁貸著卽嚴飭各州縣趕緊運米赴滬勒
限二月內埽數運到剋期放洋儼各屬再敢託詞有意遲誤卽行
嚴參必當拏問從重治罪以儆玩延其浙江省應運米石亦諭令
黃宗漢一體嚴催矣將此由六百里傳諭知之○諭據黃宗漢奏
藩司麟桂熟悉廣艇情形自願前往招募爲江浙兩省防剿之用
等語連日據楊文定楊殿邦馳奏江甯去守賊勢猖獗疊次諭令
楊文定並傳諭吳健彰雇覓艇船赴援江甯茲據該撫奏稱藩司
麟桂自願前往上海招募廣艇見已飭令星夜前往辦理甚合機
宜該藩司麟桂曾任上海道於該處情形熟悉著卽督帶船礮駛

赴鎮江上游一帶相機攻剿一面知照向榮楊文定楊殿邦等南北策應儻能將江面賊船痛加轟擊則賊氣已奪既可衛蘇省之藩籬亦可固浙江之門戶轉移之機在此一舉至本年海運最關緊要浙江米石務卽飛催各船接續開行剋期運京萬勿延誤將此由六百里諭知黃宗漢並傳諭麟桂知之○楊殿邦奏江甯省城失守逆匪盤踞城內外不下十數萬人四路劫掠勢甚猖獗復查瓜州城圯於水無險可恃上下沿江數十里皆散漫平川處處可以登陸儀徵揚州又水陸分歧非重兵數萬扼要分防難期堵禦臣雖團練糧船水手招募壯勇皆係未經行陣僅可恃以防守接仗則未能得力臣所調漕標及揚州本營各兵合計不足千名此外所調官兵尙無一起到揚何以禦此巨寇瓜揚設有疏虞北路震動關繫不淺惟有仰懇速簡重臣統領勁兵數萬星馳來揚

會同勦辦俾得早滅醜類又奏儀徵濱臨大江所募勇丁僅止二千餘名亦屬單薄前聞向榮已繞至六合上游至今仍未到江而琦善所統大兵見在行抵何處亦無文報若再遷延不到瓜揚望救無兵設或逆匪竄至其何能禦仰懇嚴飭向榮琦善各統大兵迅抵瓜揚與臣併力進勦上諭本日據楊殿邦奏賊踞金陵勢甚猖獗並因需餉孔急札飭淮揚通三屬將徵存地丁錢糧並本年截留漕糧之節省漕項幫費津貼等款解揚應用未據各州縣稟覆值此軍務緊急之時豈容藉詞推諉見在楊文定相距較遠著楊殿邦楊以增嚴飭地方河道各屬無論何款先行提解以濟要需刻下調兵遠處斷難接濟惟向榮陳金綬兩路重兵可以就近援應楊殿邦接奉此旨著一面迅催向榮設法渡江一面催陳金綬帶兵直赴淮揚合力防守其安徽江北一帶琦善統領大兵

在後接應仍可與周天爵及該督等互爲聲援也將此由六百里加緊諭令知之○命四川總督慧成馳往江南會同漕運總督楊殿邦辦理防剿○改派戶部尙書孫瑞珍會同倉場侍郎前往天津驗收海運漕糧○調倪良耀爲江蘇布政使陳啟邁爲江甯布政使以張集馨爲直隸布政使林揚祖爲河南按察使

由開歸陳許道遷

○甲午諭內閣御史蕭時馥奏請嚴禁私販硝磺等語硝磺私販售賣例禁綦嚴全在該地方官嚴密稽查庶免偷漏滋弊見當各省辦理團練之時尤應加意嚴防上年江蘇拏獲豐縣差役等與販私硝至二十五萬數千斤之多此外破獲之案甚屬寥寥卽如本年署山西巡撫哈芬行至平定州屬飭令查拏私硝該州錫麟竟敢飾詞推諉可見各該地方官因循疲玩積習相沿以致奸販肆行毫無忌憚殊堪痛恨著各該督撫等嚴飭地方文武員弁各

於隘口認真巡查儻有私販拏獲從重懲辦毋得徇爲具文致干重咎○向榮奏賊船於十七日駛至皖省江岸開帶兵勇皆由北門退走撫臣蔣文慶登陴督陣見兵勇皆潰隨卽白盡文武各官不知下落二更時賊從八卦門大小南門直入搶掠倉庫燒毀衙署十八九二十一二等日賊船陸續開赴下游河鎮總兵吉順於二十三日馳抵安慶城外二十餘里地方探聞城內尙有逆匪數百人接擄銀物該鎮卽於次早督兵入城分股追剿斃賊數十人生擒長髮賊十餘名正法餘匪逃竄業將省城收復臣抵九江後江千船隻賊擄一空無從過渡並因隨征兵勇自上年冬臘至今正餉銀未發軍火等項亦已用完必於江西省城提撥方能應用且兵勇轉戰數百里疲乏難堪斷難速其追剿又江南濱臨大江陸路多有支河汊港渡船橋梁悉被賊毀我兵到彼臨期搭橋

覓船亦復耽延時日自正月以來又無日不雨道途泥淖難行再四躊躇勢不能不由水路而下嗣據各州縣委員稟報江干船隻有被賊掠去者有居民雇覓逃難遠去者雖飭差四出而雇到寥寥臣一面行咨江西巡撫張芾由省代雇並令回空糧船前來載兵一面飭令總兵李瑞帶同各營將備親往吳城姑塘一帶封雇二十三日後僅到百餘隻而撫臣來函亦因糧船水手驟難招集多方招募不能剋期而至餉銀於二十三日僅到三萬兩臣不得已撥大兵六成先行渡江仍由陸路追擊奈春雨連綿渡江之兵軍火衣履全行沾溼止得將各路已到之船一百數十隻令貴州廣東官兵乘坐先行至二十六日復到餉銀七萬兩卽飭分給各兵勇催令於二十七日開行並令湖南廣西官兵及捷勇提標各項壯勇趕赴姑塘就船撫臣張芾又由省城續雇到江船一百一

十隻軍船三十七隻總兵李瑞於吳城雇到四百餘隻楚粵官兵
及各勇亦於初一日由姑塘登舟開出湖口臣卽於初二日由潯
開行川兵繼後臣深知金陵喫緊盼援甚殷惟是從前自將一軍
拔營甚易今蒙 皇上畀以重權必須通籌全局布置周密然後
可期得手連年以來因見各路官兵每當追賊之時憚於跋涉所
有疲弱不前者此時不能不嚴加懲治業將潮勇三千五百名全
行撤退張國樑所帶捷勇畱一千二百名撤去二千八百名提標
五項壯勇畱一千二百名撤退四百名通計撤退六千餘名其襄
陽滋事土匪昨經臣飛調總兵音德布帶滇黔兵一千二百名署
鄖陽鎮總兵耿文錦帶湖北兵八百名升用遊擊王國才申有謀
等帶滇兵七百餘名馳往會剿業已肅清所有陝西兵一千名尙
未出關自應撤回歸伍其宜昌兵五百名並湖北兵八百名雲南

兵七百餘名亦已飛咨署湖廣督臣張亮基就近撤回至音德布所帶之兵及副將瞿騰龍所帶楚兵仍調來營差遣二月初五日臣於彭澤舟次接奉諭旨著兼程趕赴江甯查三江民風柔懦一聞有警相率遷徙長江要隘於小孤山等處有險而不能守致逆船得以長驅直下臣一路目擊情形不勝痛惜自九江啟程後連日狂風駭浪舳舻未能暢行見於初十日行抵安慶省城查探賊船前隊離金陵不遠後隊尙在東西梁山一帶臣立卽催齊兵勇馳往應援惟是江南形勢本屬生疏何處守險設防殊難懸揣至前督臣陸建瀛撤回之師船大礮及所調各水勇必身到其境方可相機調撥臣見已飛咨將軍祥厚先行妥爲布置一俟臣到時再行會商辦理一面飛催長沙岳州所配船礮不分星夜駛下趕上大隊合同前進又奏臣馳抵安徽省城查得正月十七日賊船

駛至江岸防兵開礮轟擊賊亦對放槍礮巡撫蔣文慶登城督隨
見南北官兵紛紛跳城與城外官兵一同潰散勢不能支回署趕
具奏稟未及繕清已報賊匪爬城卽將奏稟交家丁馮春等隨卽
出署登城甫出西柵圍牆巷口卽遇賊數十人隨行人役潰散致
被戕害巡撫關防間交巡捕盛世忠亦已遺失文武被戕者十四
員其餘不知下落安徽省城新遭蹂躪其撫綏彈壓招集流亡事
事均關緊要臬司張熙宇業已回城籌辦三營官兵亦陸續回營
藩司李本仁退至舒城縣地方亦經調回省城料理撫臣蔣文慶
登陴督戰城亡與亡不愧守土大吏伏懇從優賜卹通判楊序鏞
等相應開列一併請旨議卹 上諭賊匪竄陷安慶巡撫蔣文慶
登陴督戰疊受刀傷殞命尙不失城亡與亡之義著加恩照巡撫
例賜卹安慶府通判楊序鏞等均著照見在官階加等議卹自蔣

文慶以下並著於該地方建立專祠以慰忠魂其餘安慶城內文武各員並著該撫查明下落詳細具奏○諭據向榮奏查明張熙宇業已回省李本仁見在舒城該藩司係該撫奏明畱省之員乃於倉庫錢糧概置不顧巡撫業經盡節而藩司以守土大員竟敢退至舒城顯係棄城逃避李本仁著卽革職拏問交李嘉端會同周天爵按律定擬具奏張熙宇防守小孤山是其專責何以賊船東下輒卽退回著先行革職交李嘉端會同周天爵確查該革員是否與賊接仗抑係聞警先逃據實具奏此外遇賊潰走之文武各員並著該撫等確查奏明按律分別治罪○向榮又奏內閣學士臣許乃釗奉旨馳赴陸建瀛軍營因長江水陸兩路梗塞難行於二月初十日與臣同至安徽省城知陸建瀛業已革職拏問許乃釗仍與臣一同前進俟接奉諭旨應赴何處軍營再當遵旨而

行 上諭內閣學士許乃釗見已行抵向榮軍營著卽幫同辦理

剿捕事宜○琦善陳金綬奏

臣琦善

臣陳金綬於本月初十一

日先後均抵安徽省城初十日向榮亦由南岸駛至安慶

臣等再

四熟商向榮仍由南岸水陸前進惟北岸兵力較單不但後路之

漢中大名等處官兵未到卽與

臣

等同在湖北拔營之兵亦因

臣

等兼程趨行彼則有鑼鍋帳房等項行走笨滯亦尙未能到齊

臣

等不及守候一面加緊催提一面就已到之兵由北岸桐城廬江

無爲巢縣含山和州等州縣陸路馳行節節追探賊蹤相機擊剿

如逆匪直犯江甯亦卽覓渡徑行追擊與向榮約定在東西梁山

地方彼此知會彼處距江甯百餘里聲息易通惟江甯在江南岸

下游有賊之處勢必無船可渡見已分飭上游之巢縣和州等處

豫覓船隻以免臨時遲誤

臣

陳金綬於十二日拔營前進

臣

琦善

亦同日起程與臣陳金綬相距數里紮營前後接應並與向榮南北聲勢聯絡會合夾擊以期有濟上諭軍機大臣等琦善陳金

綬向榮馳奏先後行抵安慶會商進剿各摺片見在金陵已失危急情狀不堪設想疊次寄諭琦善陳金綬嚴防江北向榮剋期渡江相機攻剿矣該大臣等於二月初十日同抵安慶既已會商再四諒必謀出萬全惟賊蹤靡定是否占踞金陵抑或窺伺淮揚殊難逆料著琦善陳金綬與向榮察視賊勢大江南岸如何攻擊北岸如何防守水陸要隘如何互爲聲援一切布置朕亦不爲遙制總期勦力同心速殲羣醜前調吉林黑龍江馬隊將次到齊此項勁旅於渡江不甚相宜著卽畱江北防賊奔竄或於徐淮一帶扼要駐紮以備調遣北岸江浦儀徵瓜州等處江口在在均關緊要必應督兵前往與楊殿邦合力防堵毋稍遲誤周天爵勦辦安徽

土匪勢難兼顧東南半壁朕惟該大臣等是倚偵探賊勢勦辦情
形必當隨時馳報以慰懸念所過州縣倉糧漕米俱准酌量動用
兩路餉銀亦可彼此通融撥放各歸糧臺報銷近來籌款之艱該
大臣等亦所深悉切須撙節毋任浮冒鄧紹良昨已補授江南提
督仍可隨同向榮勦賊玉山已調補壽春鎮總兵官江北止此重
鎮著卽迅赴新任督兵勦捕土匪以專責成將此由六百里諭令
知之○諭見在江甯省城失守據琦善陳金綬向榮奏報均於本
月初十十一等日行抵安慶卽日督兵前進已諭令該大臣等於
大江南北兩岸扼要合力攻勦矣賊情詭譎異常難保無奸細北
來窺探希圖勾結土匪爲患山東河南地方疊經諭令該撫等親
赴要隘嚴密設防畿輔重地尤關緊要所有各屬保甲聯莊並整
頓營伍嚴防黃河渡口諒已遵旨妥辦惟界連豫東等處稽察彈

壓必須大員督辦與鄰省聲勢聯絡方足以定民志而杜奸萌著
訥爾經額體察情形如須親身扼要駐紮卽奏明前往總期有備
無患毋致臨事周章將此由四百里諭令知之○諭有人奏山東
兗沂曹三府匪徒聚擾猖獗情形見雖未著而當逆氛正熾之時
心懷觀釁亟應防其勾結等語著李德卽督率地方文武員弁認
眞查拏或統兵會剿或購綫躡緝總期淨絕根株毋致養癰貽患
見在黑龍江官兵改道由山東行走如該地方兵力不敷該撫卽
可將此項官兵就近暫留數日藉資剿捕朕已令琦善等酌量布
置仍著隨時知照毋誤事機再滕縣知縣黃良楷聞其膽勇過人
匪黨畏憚如果屬實該撫卽責令專辦緝捕當可得力也將此由
五百里諭令知之○命在籍前任漕運總督朱樹陝西布政司陶
廷杰湖北布政使唐樹義等督辦貴州團練事宜○頒朝鮮琉球

暹羅國 御書匾額○乙未諭內閣前因湖北省准鹽阻滯降旨准其借銷川鹽潞鹽以資接濟茲據張亮基奏川鹽轉運既易成本亦輕較之潞鹽更爲便利自係實在情形著四川總督卽飭鹽茶道借撥川鹽二千引迅速解赴湖北以濟急需俟江路廓清淮引通暢仍照舊章辦理○諭張亮基駱秉章奏籌辦收復撫恤各事宜開單呈覽一摺湖北武昌漢陽黃州等處先後被賊竄擾蹂躪凋殘深堪憫惻見經該署督撫飭司道各員次第籌辦如修城製礮協撥驛站並募勇招商戢匪各事宜所籌尙屬周妥至被害官兵流亡子女或應掩埋屍骨或應設局收養均著照所議妥籌辦理所需經費務當覈實動用毋任吏胥人等絲毫浮冒俾窮黎均霑實惠地方日就乂安○陳金綬勝保奏查該逆已至江甯占踞對岸浦口見在南岸已有向榮由水陸分兵攻剿臣等若再渡

江會合不但見無船隻且恐北岸空虛賊易奔竄況浦口與淮徐
廬鳳無爲六安及河南光信一帶道路相通設再蔓延爲患更鉅
惟有仰懇密飭向榮由南岸迅速進剿設法燒斷逆賊浮橋以免
賊匪北竄臣等星速督兵直攻浦口賊營與向榮約定日期南北
兩岸同時並進如北岸浦口賊營一破則南岸賊勢自孤臣等卽
設法渡江與向榮會合夾攻似爲勝算至琦善所帶陝甘直隸已
到之兵尙止二千餘名其餘馬步隊均未趕到實在無可撥調前
在安慶時曾屬臣等先行琦善卽隨後趨赴接應計臣等一
到浦口與賊接仗琦善相距不遠聲勢自然聯絡臣等已於十五
日由桐城取道舒城合肥滁州一帶直赴江甯浦口進剿惟土匪
疊起地方不靖臣等須步步爲營以防不測惟有極力督兵行走
以期迅速前進 上諭軍機大臣等昨以該大臣等同抵安慶已

有旨令察看賊勢進攻南岸防守北岸矣江甯未陷以前逆匪已將浦口占踞若不及早克復則儀徵瓜州等處江口在在堪虞向榮統領大兵水陸並進見在想已渡江著卽分路夾攻出奇制勝其江北一帶著陳金綬勝保督率弁兵扼要駐紮迅將浦口賊營併力攻破不惟遏賊北竄且可與向榮會合夾攻以殲羣醜琦善陳金綬趕到更可互爲聲援相機接應所有逆賊浮橋尤須及早燒斷著向榮陳金綬勝保等察看情形何處可以得手卽向何處燒毀總期斷其紛竄之路俾進退無據則剿辦方可得力將此由六百里加緊各諭令知之○命前任湖北布政使唐樹義赴湖北幫辦撫輯事宜○丙申諭軍機大臣等昨有旨令陳金綬等迅將浦口賊營攻破遏賊北竄本日據楊以增奏江北防堵緊要請飭發大兵馳赴清江浦一摺逆賊蟻聚江甯必藉浦口賊匪爲接應

以便牽制我師梗塞江路必須先將浦口占踞之賊剿滅其六合儀徵瓜州等處江口均關緊要亦不可顧此失彼此時向榮諒已渡江相機攻剿琦善陳金綬等務卽將北岸江口先行廓清萬不可令賊匪北竄其黃河南北兩岸防不勝防自應擇要駐守重兵如揚州爲由淮入河門戶清江浦爲渡江咽喉該處存兵無多見調各兵未能按期趕到著琦善陳金綬迅卽酌撥官兵數千名飭赴淮揚一帶會同楊以增楊殿邦併力防堵琦善所帶之兵刻下想早到齊吉林黑龍江馬隊均可趕到應如何擇要布置該大臣等自必習有成竹至河南陝西防兵內如須添調卽著酌量緩急辦理總期前扼江北爲南岸聲援後據黃河爲北路屏障是爲至要將此由六百里諭知琦善陳金綬並傳諭勝保知之○諭楊以增奏江北防堵緊要請撥兵餉一摺據稱江南黃河渡口不下百

數十處必須扼守來路揚州爲清江浦渡河必由之路安徽宿州亳州等處爲徐州渡河必由之路扼其來路兵力易集其收至北岸船隻尤恐捻幅各匪勾通逆賊偷放必南北兼防方足以杜賊蹤等語所奏頗爲明晰河標存營兵丁不敷調遣漕標兵丁亦屬單薄惟琦善所帶官兵可以就近接應著卽遵旨飛催酌撥接濟本日已有旨令慧成帶陝西官兵數千名馳赴淮揚一帶會同防剿矣所請江南狼山鎮標兵一千名掘港靖江鹽城三營兵各一百名並著飛咨調撥以資防守至招募壯勇勸諭團練收集洪湖南岸船隻資遣難民均著照所議辦理該督等務宜督飭文武員弁晝夜嚴防尤宜彈壓土匪查拏奸細一有奸匪蹤迹或土匪勾結卽嚴拏究辦斷不可稍涉大意所需餉銀數十萬兩前因楊殿邦請餉已由戶部議准撥給山東藩運兩庫及長蘆解部庫款銀

三十萬兩自可通融動用河庫無論何款亦須先其所急極力籌畫近日籌餉之艱諒所深悉務須加意撙節勿稍浮冒另片奏請飭查文經辦理江北防堵等語前有旨令該員畱辦豐工未盡事宜並巡查黃河渡口著楊以增卽飭該員幫辦防堵至周天爵前奏令該員管理糧臺事務是否尙能兼顧著該督等酌量咨商辦理將此由六百里各諭令知之○丁酉工部左侍郎呂賢基奏臣於二月十七日行抵宿州接據江北各州縣稟報自安慶失守後匪徒竊起肆行劫搶經署撫臣周天爵分飭兵勇四路擒拏立卽斬首梟示並通飭各屬嚴拏兇捕盡法懲治各屬聞風稍知儆懼道路漸通而根株猶未剪滅見諭各地方文武員弁協同紳士上緊緝拏就地正法以儆兇頑並將團練章程出示曉諭札飭各州縣遵辦又派隨帶各員分路察訪臣暫駐宿州與周天爵悉心籌

商俟規模略定再親赴各郡督率辦理 上諭內閣呂賢基見已

馳抵宿州著卽督辦團練事宜並會同周天爵李嘉端飭令地方

文武員弁練兵團勇加意防堵曉諭紳民殲除土匪其官紳士民

中辦理有成效者卽著分別奏請施恩以昭激勸○以江蘇布政

使倪良耀代辦巡撫事○建立江南豐北工次 河神廟○戊戌

諭軍機大臣等據載銓奏帑項不足宜急籌長策節妄費歸實用

等語覽奏均悉本日據御史怡廉奏請派在京八旗及三省勁旅

速赴江南攻剿並酌減行裝銀兩一摺所奏是否可行著卽悉心

酌覈據實奏聞原摺著封給閱看將此諭令知之○諭琦善馳奏

探聞江甯失守見在趕緊設法鈔出賊前一摺據稱本月十八日

行至合肥探得江甯省城於十一日自寅至午礮聲不絕隨後城

內火起賊由火起處穿城而進約計其時向榮兵尙未到已飛咨

陳金綬等星速前進由浦口直趨儀徵徑赴瓜州渡江繞至龍潭
鈔出賊前會同向榮楊文定等杜絕下竄等語所見甚是江甯失
守疊次寄諭琦善陳金綬嚴防江北向榮渡江進攻諒已接奉諭
旨一一籌辦賊蹤靡定總須南北兩岸互爲聲援南岸如何攻擊
北岸如何嚴防該大臣悉心籌畫謀出萬全昨據楊文定奏雇得
上海夾板船隻載運礮械及舢板船隻駛往金陵刻下向榮兵船
計已駛到若能上下夾攻乘風縱火將江面賊船浮橋燒斷燬其
輜重勦辦自易得手所稱馬隊不宜用之江南正與日前諭旨相
符著卽畱於江北扼要駐紮以備調遣另片奏粵楚鄉勇沿途滋
擾且恐潛通消息易聚難散別滋事端前已有旨令該大臣等嚴
拏懲辦並准團練紳民格殺勿論仍著向榮於所帶募勇加意防
範總以設法陸續遣散爲要慎勿勉強羈縻致貽後患近日攻剿

防堵各情形並隨時馳奏以慰朕懷將此由六百里各諭令知之
○命在籍前任太常寺卿廖鴻荃光祿寺卿楊慶琛浙江提督李
廷鈺江南福山鎮總兵官孫雲鴻等督辦福建團練事宜○予湖
北殉節提督雙福祭葬世職諡武烈總兵官王錦繡諡壯節常祿
諡剛烈均贈提督銜予祭葬世職與同知王本立等均附祀常大
清等專祠○己亥諭內閣向榮奏參違抗軍令之將官請先行斥
革一摺湖南九溪營遊擊儘先副將鄭魁士帶領兵船隨同剿賊
經該大臣持令往催竟不遵行自應立正軍法據向榮奏稱該員
平素尙屬勇往爲將備中得力之員著暫從寬典先行革職責令
戴罪立功作爲前隊以觀後效如再稍有玩誤卽於軍前正法此
後軍營帶兵將弁儻有仍蹈疲玩畏葸惡習不遵調度貽誤軍機
者該大臣等於查明後如係提鎮大員卽奏聞請旨正法其副將

以下各官卽著一面正法一面奏聞毋庸先行請旨以肅軍令統兵大員信賞必罰總以功罪爲衡小胥微疵尙可論功相抵若至貽誤事機則是自干憲典雖從前著有微勞亦不能稍從末減朕於統兵大臣議功議罪亦卽准此爲斷該大臣等所統者朕之將士所執者卽朕之法律當此因循日甚豈容再存希恩遠怨之心著向榮琦善陳金綬各將此旨宣諭在營大小員弁以期同心戮力迅掃妖氛懷之勉之○諭前有旨命江西安徽江蘇各督撫查明沿江一帶被兵處所奏請蠲緩撫恤見據向榮奏稱安徽沿江各州縣經賊蹂躪居民糧食盡被擄掠顛沛流離深堪憫惻見在李嘉端尙未到任著呂賢基周天爵先行督飭署藩司奎綬臬司張印塘派委賢員迅速分赴各屬勞來安集並飭將鄰近未經被擾各州縣倉穀趕緊碾運協濟或於經徵漕米內酌量畱撥分別

散賑平糶務須諄飭委員實心經理俾吾民於兵燹之餘得資餬口毋致仳離失所並著各地方官嚴密稽查勿令災黎展轉流徙致爲土匪勾結別滋事端○諭怡良王懿德奏稱閩省緝匪情形懇恩寬免失察處分一摺土匪勾結滋擾亟應嚴拏懲辦惟地方官失察處分綦重往往因一犯經歷數縣一縣牽連數官慮被展轉糾參累及通省並有自經訪獲復因另犯潛住數日不能免議以致上司各官相率回護養癰貽患所奏自係實在情形此時查辦匪犯正當喫緊之際若非破其痼疾斷難專以責成著王懿德卽行嚴飭所屬文武各員認真查拏一有匪徒結會惑眾斂錢傳習滋事如能隨時覺察立即掩捕破案並將傳染之犯悉數擒拏懲辦或將外來奸細偵探弋獲俾免勾結均准將該地方官應得失察處分悉予寬免四川懲辦匪徒有就地正法之案閩省山海

錯處奸匪易滋即可仿照辦理以儆兇頑儻地方官仍有縱匪不辦或諱飾消弭者該督撫卽行據實嚴參不得巧爲開脫轉滋流弊○諭黃宗漢奏接據倪良耀鈔送奏摺與見辦海運情形不符據實參奏等語前據倪良耀奏稱浙省海運米石起運赴滬者僅六萬餘石覽奏殊堪詫異此次江浙兩省海運特旨派倪良耀總司其事何以於浙米撥運確數奏報含混顯係任聽屬員誑稟以爲本省辦理不善地步倪良耀著交部先行嚴加議處仍責令將浙省赴滬米石並蘇省起運未完米石一律趕緊催辦儻有貽誤朕惟倪良耀是問○諭軍機大臣等前據倪良耀奏海運漕米遲滯聲明浙米據報到滬者僅止六萬餘石其實在上船者尙無確數江省四府一州屬起運到滬米數僅止六萬七千餘石當經諭令該司一律嚴參本日據黃宗漢奏浙米起運赴滬已有三十餘

萬石內十二萬餘石頭批兌給商船白糧亦全數裝兌於二月初四日船至吳淞口候風等語覽奏曷勝詫異倪良耀此次辦理海運實屬遲延前奏勒限嚴催朕已覺其辦理不善豫爲卸責地步降旨嚴飭茲據黃宗漢參奏倪良耀係特派總辦江浙兩省海運之員何至於浙米起運確數含混奏報且據稱倪良耀有先送眷屬搬移杭州之事大員舉動如此何怪民心惶惑值此軍務緊急若再貽誤海運將何以對朕耶本日已明降諭旨將倪良耀嚴加議處仍著將江浙應行海運米石一體嚴催趕緊放洋開行陸續北上儻再觀望遷延專顧私事以致有誤正供雖欲藉詞卸責斷難逃朕洞鑒必將倪良耀從重治罪決不寬貸將此由六百里諭令知之○向榮奏連日疊據探報稟稱逆匪於正月二十八日至金陵城外焚燒民房上下十餘里水道俱賊艘灣泊南岸一帶南

門通太平府陸路東門通鎮江府陸路距城七八十里均紮營築
堡防我後路追兵金陵對岸浦口地方亦有賊守並時有船隻往
來蕪湖縣城搬運糧米臣連日催督兵船揚帆東駛前隊兵勇已
於十四日晚趕抵蕪湖兵勇一擁登岸立將守糧之賊殺斃多名
餘俱逃竄當將蕪湖收復臣於十五日早趕到卽日舍舟登岸由
陸路趕赴金陵援救惟臣所帶皆係陸兵不習水戰且水戰利器
必須礮船在先轟擊兵船方能繼進見在礮船爲數無多且各路
所調礮位未齊止得在蕪湖趕造礮船俟調取礮位解到卽可分
配各船再由水路進剿臣陸路之兵先抵金陵城下紮立營盤以
爲城內聲援再將蕪湖水次各兵相機前進紮成水寨與陸兵相
爲犄角至琦善所帶各兵雖係生力然未經大敵不敢驟令當先
臣前在安慶已與面商臣兵先進琦善之兵在後作爲接應至提

臣陳金綬與

臣

當日同隸楊遇春部下最爲相得茲又共事一方

更當勦力同心勦除醜類

臣

素聞江南民風柔懦恐被圍以後目

擊心驚相率逃散見在四路出示告以大兵已到立即赴援務宜

同心固守並又恭錄諭旨破格獎勵團練等因備文專弁繞道入

城交將軍祥厚一體刊刻曉諭先期固結人心一面酌撥精兵勇

將設法入城協同守禦庶省垣可保大局無虞至閩浙粵東水師

與火輪各船

臣

先已飛札催調並令趕緊駛入大江援救金陵又

恐該逆渡江北竄已飛飭淮揚徐各地方官趕緊開挖城壕補葺

垛口繕兵練勇豫爲防守

上諭江甯失守疊經降旨令該大臣

等督兵於南岸進剿北岸嚴防向榮於十五日即抵蕪湖距江甯

不遠何以十七日奏報尙不知江省失守之事豈沿江一帶毫無

偵探耶殊不可解據稱蕪湖城內賊匪逃竄派兵由陸路馳赴金

陵見已救援不及令人憤恨止可於水陸扼要處所相爲犄角以圖克復尤須將水面賊船浮橋先行設法燒毀若南岸之兵離省遠紮營盤北岸之兵又復遠離各江口要隘任賊從容布置爲負隅久踞之計或聽其南北分竄安用該大臣等督兵赴援爲耶江甯省城及太平池州等府文武官員下落著卽查明具奏將此由六百里各諭令知之○以王懿德兼署閩浙總督由福建巡撫署○庚子諭內閣前有旨諭將湖北武昌漢陽兩城殉難各員道府以上之子孫帶領引見因思軍興以來各省帶兵提鎮大員或臨陣捐軀或守城殉難均宜賞延後嗣以慰忠魂除先行降旨准將子孫帶領引見各員外其餘陣亡殉難總兵以上大員子孫均著俟百日服滿及服闋後由該旗該部帶領引見候朕施恩○諭軍機大臣等周天爵奏請另簡統帥並自請爲副併力進剿具見忠悃惟統

兵大員一時實難其選且該侍郎在皖日久素爲士民所信服見在廬鳳等處土匪蠭起若帶兵遠離該匪等必至肆行無忌萬一粵匪潛行勾結爲害更鉅所有勦除各郡縣土匪著卽責成該侍郎專辦總期悉數殲除使地方一律肅清方爲不負委任至團練兵勇呂賢基見已抵皖著卽督同袁甲三趙昀及公正紳士妥爲籌辦該員等爲人望所推眾擎易舉果能練成勁旅不惟保衛鄉閭且可爲勦滅土匪之助袁甲三趙昀二員何人辦理合機著隨時奏聞安徽巡撫李嘉端不日卽可抵任所有招集安撫各事宜責無旁貸惟立政以用人爲先當此瘡痍未復非得賢有司實心經理何以解懸救溺民慶更生朕聞廬鳳一帶府縣各官貪鄙者多清正者少該撫抵任後著卽嚴行甄別其昏庸不職及貪劣各員訪聞得實從重參劾庶不失察吏安民之至意本日御史王茂

蔭奏擒匪四起請速剿除各摺所奏不爲無見據稱桐城練潭鎮賊匪有馬千餘匹其志似將北竄宜及早殲除著周天爵等密速查拏毋令滋擾又稱九江失守後壽春營都司海陞先行逃避兵亦隨散守備左德暎先搬家屬出城並私派兵丁護送置城池於不顧著李嘉端查明嚴辦毋稍徇隱原摺片均著摘鈔寄閱李嘉端前請鈔飭關涉安徽諭旨摺件除將蔣文慶摺件並應錄諭旨諭令軍機處檢鈔再寄外所有呂賢基周天爵前奏摺件並所奉諭旨均著照錄移咨李嘉端一體遵辦將此由六百里各諭令知之○諭上年逆匪自粵竄楚所過郡縣望風潰破地方文武除蒲圻縣知縣周和祥外從未聞一人嬰城固守以待援兵而軍營帶兵及防堵各員亦皆聞警先遁赴援不前以致岳州武昌相繼失守此等庸懦畏葸之員若不早正刑章何以肅軍律而厭民志該

督撫等於疊奉嚴旨竟敢置之度外延不覆奏如劉長清余萬清等罪名早已審訊定擬朕所以令解交刑部者原欲使供情確鑿共見其聞並非謂情有可原姑緩其死俾得從容就道也岳州棄城逃避之博勒恭武罪無可追特因其有墜馬受傷一語若不詳查罪狀亦未能昭著是以諭令查辦乃逃回武昌之後直至城陷查無下落該督撫等到省已將市月事事皆能經理豈獨於此一人竟至無從查考耶阿克東阿業已奉旨斬決至今亦未遵旨具奏尤出情理之外似此瞻徇延玩是直欲聽若輩隱匿病故然後援照廉昌胡方穀之例以業經身故一奏了事在朕則法無可加而該督撫等則自詡陰功盛德是何政體是何居心賊匪初竄湖南地方文武猶有一二畏法者以力竭自解迫至郴州道州連次潰陷大吏從不查參卽至避匿逃回亦無一言論及以致效尤接

踵習爲故常該督撫等當賊匪在境之時或可藉詞無從訪聞今賊去已遠被兵州縣中有收復已經半載者何至毫無覺察任聽此等庸員逍遙事外朕不知該督撫等何顏對此兵燹遺黎也著張亮基駱秉章潘鐸於接奉此旨後勒限半月將業經奉旨解部及斬決各犯迅速遵辦其失事地方未經入奏之文武官吏並軍營將弁一律嚴查定擬罪名具奏如再遲延遺漏朕必將該督撫等重懲不貸懷之將此由六百里各諭令知之○諭寄諭兩江總督怡良江蘇巡撫楊文定安徽巡撫李嘉端江西巡撫張芾逆匪自竄出武昌以後擾及江西安徽江南連陷城池各該地方文武員弁除守城殉難各員外均有應得之罪○有江西九江所屬地方安徽省沿江各府州縣並江南省被賊處所著該督撫查明該文武各員有棄城先逃臨敵退避者卽行革職拏問按律定擬罪

名迅速具奏毋得稍有瞻徇遲延致干重咎將此由六百里各諭令知之○諭據陸應穀奏盤獲奸匪究出夥黨潛赴京師開單呈覽一摺該犯等膽敢聽從僞令潛至京城白雲觀挂單探聽消息不法已極並恐所指地名或有不確其潛匿京城者亦恐不止此數人著步軍統領衙門順天府五城按照單開各年貌服飾嚴密迅速查拏務獲並將似此形迹可疑之匪一併偵訪擒獲究辦毋得稍有洩漏致令遠颺原單著鈔給閱看將此各諭令知之○辛丑大葬 孝和睿皇后於 昌西陵命大學士裕誠協辦大學士賈楨恭題 神主○諭內閣給事中雷維翰奏閩浙江西交界處所請飭查緝一摺福建浙江江西等省交界地方有銅塘山久經封禁並設立防汛撥兵巡查防守立法本極周密第恐奉行日久地方官視爲具文春秋巡緝輒以一奏了事該處界連三省地方

險阻奸匪易滋著福建浙江江西各督撫嚴飭各地方員弁認真
巡查會緝儻有匪徒竄匿務須不分畛域隨時嚴拏懲辦以弭盜
源○命在籍前任工部侍郎車克慎等督辦山東團練事宜○王
寅諭內閣前有旨派左都御史花沙納陝西道御史王茂蔭會同
戶部堂官妥議鈔法奏明辦理茲據花沙納等公同酌議具奏並
繪具官票式樣進呈朕詳加披覽所擬章程各條尙屬周密著卽
照所請定爲官票名目先於京師行用俟流通漸廣再頒發各省
一律遵辦官票之行與銀錢並重部庫出入收放相均其民間銀
錢私票行用仍聽其便商賈交易亦無抑勒洵爲裕國便民良法
總期上下相信歷久無弊卽使國用充裕官票照舊通行該部卽
遵旨刊刻告示並著步軍統領衙門順天府五城一體出示曉諭
遵行○又諭載銓奏請申明會議舊章一摺國家有大政事特交

會議諸王大臣等自應公同會集虛衷商榷討論精詳方於政事
有益嘉慶年間曾奉 諭旨其有特交會議事件凡與議之王大
臣俱限一二日齊集公所當面公同商辦不准令司員章京往來
傳稟互相推卸如有不到者卽著到班之王大臣指名奏參到班
之後在官言官毋許泛論別事煌煌 聖訓各宜懍遵若如載銓
所奏近年以來凡遇會議事件或託故不到或推諉不言或且藉
端閒談置公事於不問其首先發言之人或目爲擅專或笑其浮
躁甚至遇有交議並不會集一任主豪衙門委之司員屬吏分送
片稟各衙門堂官隨同畫諾或明知未協而不肯言或依違將就
而退有後言似此因循委卸相習成風又何用會議爲耶嗣後諸
王大臣等如遇特旨會議事件務須遵照舊章公同面商虛心籌
酌迅速定擬具奏毋得推諉耽延仍蹈積習用副朕集思廣益之

至意此旨著各衙門恭錄懸挂俾觸目警心遵守無忽○陳金綬
勝保奏臣等於二月二十一日行抵江浦接壤之全椒縣接據江
浦縣稟賊屢次犯境俱經該縣文武併力抵禦並未入城惟縣屬
浦口係江甯對面一大鎮市見在賊船密泊並聲言指日率眾萬
餘北渡等情伏思該逆此番過江未必非欲嘗試北兵利害臣等
所帶兵丁僅四千名尙形單弱見已飛調馬隊藉資衝擊惟有相
機辦理庶可不至失機俟浦口一復卽當咨琦善駐守浦口督兵
接應臣等卽設法由六合一帶渡江以便會合上下攻剿見在向
榮已抵和州距江甯止百餘里卽日可由上游進剿臣等業已知
照定期進兵仍與琦善合防北岸遏賊上竄勝保又奏江甯一府
爲東南保障江甯一失全局震動必須豫爲籌畫逆賊思竄之路
亦應早爲防備臣等日思渡江逼近賊營奮力合剿然以大局而

論北岸雖有琦善駐守浦口策應而和州直通廬州六安勢不能不分兵據守至下游北岸由六合可達徐州由瓜州可至淮安雖揚州已有楊殿邦帶兵堵禦而淮徐一帶不可不豫爲計臣愚以爲宜速飭信陽防兵移紮六安廬州等處爲北岸後路接應更宜就近添調弁兵在清江浦一帶扼要駐紮爲揚州聲援並將襄陽駐守之兵進移湖北漢黃等處以備調赴下游堵截賊匪上竄並擬咨令向榮攻剿江甯西南等門賊營水陸布置臣與陳金綬相機攻剿江甯東南等門若再將廣東調來礮船由水路進擊東下賊船庶可大挫賊鋒上諭軍機大臣等前因逆匪竄入江甯疊經諭令該大臣等公同合力進剿原期酌量緩急相機籌辦並非專以防守北岸爲要於江南攻剿事宜置爲緩圖也軍旅之事變幻靡定若藉口遵旨株守江北任賊從容布置不但蘇常一帶蹂

躡堪虞萬一渡江北竄其能當此兇鋒不令闌入否陳金綬係幫辦大員且久歷戎行何以漫無定見著與勝保迅速籌商先將浦口賊匪剋日殲除卽渡江救援江甯亟圖克復其江面賊船浮橋務當設法先爲燒毀使賊不能北渡得以併力進攻又據勝保奏調信陽兵移紮六安廬州等處爲北岸後路接應並就近添調弁兵在清江浦一帶扼要駐紮爲揚州聲援將襄陽守兵進移湖北漢黃等處以備調赴下游堵賊上竄等語所奏不爲無見本日已諭令羅繞典張亮基駱秉章陸應穀等各將該處防兵除酌畱外餘俱豫備調撥矣勝保見已補授內閣學士幫辦軍務責無旁貸若與琦善陳金綬同心戮力迅掃賊氛並隨時酌量無論江南江北何處緊急卽便宜辦理毋得拘泥候旨致誤事機陳金綬等見軍情緊急四千名實屬單弱所有吉林黑龍江馬隊已陸續趕到

琦善所帶各路精兵刻下亦斷無不到之理著卽分撥三四千名
交陳金綬等大營聽候調遣並著陳金綬勝保迅速催提毋任延
誤總之江北地面延袤數省防不勝防若不激勵將士設法進剿
不但糜餉勞師轉恐賊燄益熾該大臣等膺茲重任務當妥籌全
局與向榮隨時知照合力進剿毋再觀望遷延任賊分竄致干重
罪勝保摺片均畱中將此由六百里加緊各諭令知之○諭勝保
奏亟籌大局宜速飭信陽兵移紮六安廬州等處爲北岸後路接
應更宜就近添調弁兵在清江浦一帶扼要駐紮爲揚州聲援並
將襄陽駐守之兵進移湖北漢陽等處以備調赴下游堵賊上竄
各等語所奏不爲無見軍情變幻原難逆料必期有備無患頻年
軍務總誤於緩不濟急以致逆匪鴟張殊堪痛恨著羅繞典張亮
基駱秉章陸應穀按照勝保所陳除酌畱防兵外將可以調移之

兵移遠就近一週徵調卽令星速馳往庶緩急可資勦辦可期得力將此由六百里各諭令知之○擢候補四品京堂勝保爲內閣學士命幫辦江北軍務○癸卯向榮奏臣馳至蕪湖後聞江甯城大兵單斷難久守星夜馳至江甯縣境始知賊於正月二十七日先到省城南門外紮營二十九日及二月初二日均用火箭巨礮攻打初四日以後並至水西旱西儀鳳等門四面環攻攻城之賊被城內礮火擊斃甚多初十日逆匪先攻儀鳳門甚急城內之兵皆聚一處堵禦該逆見水西旱西南門三處兵少遂接木梯爬城而入四門同時被陷賊隊擁進聞旗兵拚命死關殺斃賊眾不下三四千人見在城內滿漢大小各官均無下落臣卽於十八日馳抵江甯縣之板橋查看近城紮營處所詎該逆先於城外多掘陷坑密布竹籤並於長壽橋左右築有土城連紮賊營數座防備甚

嚴此外俱係小河無可繞越因查東路孝陵雄黃鎮一帶地勢寬
敞進攻較易兼可扼賊竄擾蘇常之陸路當卽統兵繞從秣陵關
一帶馳往東路度地紮營相機進剿惟金陵旣已失守北路空虛
誠爲可慮臣飛咨琦善統帶官兵卽於北岸扼要之處駐紮設法
堵禦杜其北竄之路其淮揚徐州一帶臣先已飛咨楊以增轉飭
各該處嚴密防守矣臣伏思流賊荼毒三載蹂躪六省皇上軫
念江南惟恐生靈再遭塗炭界臣以督師重任馳往救援並且疊
次嚴飭以此城安危繫於一身茲竟不能先事趕到設法保全實
屬負國負民罪無可逭相應請旨卽將臣交部從重治罪以爲玩
誤不職者戒見在惟當激勵將士恢復金陵盡掃狂寇以冀稍贖
罪戾上諭軍機大臣等向榮馳奏救援金陵遲誤請從重治罪
復據許乃釗奏請暫緩易將責令戴罪立功各一摺前以安慶失

守疊經降旨令向榮督兵馳赴江甯救援乃該大臣行抵九江住閱旬日據正月二十九日張芾奏報已雇船四百餘隻又備糧船一百餘隻並籌備糧餉催令啟行而該大臣於本月十五日始抵蕪湖其遲誤之罪與琦善之不能赴援安慶無異即將該大臣等按律懲辦明正典刑亦屬咎由自取惟念一時簡用乏人且臨敵易將兵家所忌向榮著卽責令戴罪圖功以觀後效據稱該逆於城外多掘陷坑密布竹籤並築土城紮營數處總由援兵遲緩致賊得以堅壁自守其東路雄黃鎮一帶既經查明地勢寬敞進攻較易兼可扼賊竄擾蘇常之路見已馳往紮營著卽相機妥爲布置軍情旦夕變還原難遙制但以目前事勢而論總當毀賊浮橋燒賊船隻使江面先就肅清賊匪無從北竄方可專意進攻前調湖南船礮並吳健所雇廣艇諒可陸續到齊著卽定期知會水

陸並進並隨時知照琦善陳金綬等或於後路接應或於北岸嚴防總期合力進剿俾賊進退失據方能制勝該大臣已邀寬典感激之餘必更思奮諒能殫竭血誠矢滅此賊以副朕望也另片奏祥厚關防恐爲賊得該大臣關防另鐫四字以辨真偽自應如此辦理除已知會琦善外所有各督撫及軍營各糧臺卽著向榮迅速咨行以防僞冒將此由六百里加緊諭令知之○湖北市政使岳興阿奏謝恩請覲得旨著毋庸前來速赴新任目下楚省緊要猶循例請陞見殊屬不曉事體○命前任江南河道總督潘錫恩赴安徽太平府一帶辦理捐輸團練事務○甲辰諭內閣前據惠親王等奏請添兵剿賊並親王銜定郡王載銓奏酌派精兵各摺先後交大學士軍機大臣九卿會同戶部議奏茲據合詞覆奏所議各條均屬周妥見在欽差大臣向榮統帶各路大兵並續到之

陝甘兵咨調之雲南貴州湖北等省官兵欽差大臣琦善幫辦軍務陳金綬勝保統帶京師火器營及吉林黑龍江馬隊並西安等處駐防直隸山東山西陝甘等處官兵分路攻剿怡良慧成復帶福建陝甘精兵星馳會合南北兩路併力進攻蠢爾么膺諒不難剋期掃蕩惟東南數省蒼生疊遭荼毒朕每一念及寢饋難安仍宜厚集勁兵迅殄羣醜著將見在桐城之山東兵先令趕赴楊殿邦楊以增軍營交其管帶其由襄陽撤回之直隸大名宜昌陝甘湖廣雲南各標鎮兵均令趕赴江北琦善陳金綬軍營由該大臣等擇要調紮以爲兩岸攻擊之助仍著琦善等體察兵力如須酌添卽由舒興阿調赴商州防兵內再行咨調以資策應以上各路重兵覈計程途均距江皖甚近不難迅速到營並著西安甯夏綏遠城各將軍將諭調各駐防官兵均卽選派得力營員迅速管帶

啟程交慧成調遣前此豫備候調之吉林黑龍江各官兵著該將軍等亦卽派員分起管帶由京前進至所請調察哈爾馬隊官兵歸化城馬隊官兵蒙古馬隊官兵及察哈爾馬匹著各該將軍並東三盟蒙古王等一併豫備奏明候旨遵行其餘籌備軍餉各款均著照所議辦理○是月免奉天金州等四廳州縣上年水災額賦